

11
10m qwee

Kwenda cha Kristu

Ndongo ja ku Lilongesa

LUCIO LARA

ARQUIVO L. LARA

Kwenda cha Kristu

Ndongo ja ku Lilongesa

(Chokwe)

1960

Garenganze Evangelical Mission
Dilolo, Congo.

Luka 1. 26-38 ; Mateu 1. 18-25. Ndongo 1

SANGO LIZE LIKATUKILE MWILU

CHIHANDA CHA KULILONGESA - Iye kumakasema mwana-linga, ukamuluke jina ngwe, YESU ; mumu Iye kumakalamwina atu jenyi ku milonga yo. Mateu 1, 21.

YIKUMA YA NDONGO

1. Mu Usendo Ukulu alakenyene kutuma Chilamwina.
2. Sango lia mungelo kuli Maria.
3. Yalweza Yosefwe mu chilota.

MANYONGA

1. Zambi watangile hashi ni atu jaho.
2. Zambi iye wa mutolo.
3. Zambi umuwika hiridu atatu.
4. Shili yakutubandununa kuli Zambi.
5. Ulamwino - chatamba kulilamwina.

Zambi, iya wamutangile? Niumwe watangile Zambi wakuhi. Iye wapwile kwe ku uputukilo.

Shimbi yamuchiali. 33, 27 ; Samu 90. 2.

Hatangu, kubapwile hashi, chipwe lilu, chipwe matononoshi, chipwe kakweji, chipwe tangwa, chipwe meya. Nichechimwe kuchapwileko. Hashi heswe hapwile habululu, hamokomoko. Mba nunahula, Iya wapwileko nyi? Zambi. Zambi, mwe Tata, ni Zambi mwe Mwana, ni Zambi mwe Spiritu Musandu.

Uvulumunyi kuchi upwa? Shili kuchi yipwa? Yeswavo kuyapwile nikulita ni Liji lia Zambi, nikulita ni upale wenyi, yapwa shili. Mahuza, ni kujanjika maliji api a sonyi, ni kwiya, ni kulelesa tatenu ni noko. Akwa hashi eswe akwa shili. A - Roma 3. 23.

Kulibandununa kuchili hakachi ka Zambi ni atu mumu ha shili. Zambi wazangile akwa shili alioze kazangile yitanga yo yipi, kashika watumine Mwene Yesu Kristu mu kufwila akwa hashi. Kufwa chenyi, e manyinga jenyi afwetele shili yetu ni milonga yetu yeswe.

YIHULA

1. Iya watangile hashi ni atu jaho?
2. Zambi, iya wamutangile?
3. Mazambi angahi aliko?
4. Atu angahi? Aya?
5. Uvulumunyi kuchi upwa?
6. Yika ya kutubandununa kuli Zambi?
7. Mungelo wasolokele kuli iya?
8. Sango lienyi lika?
9. Jina lika alukile Mwana? Kuchi chinalumbunuka?
10. Kuchi te Zambi watumine Mwanenyi hano hashi?

CHAWANA CHA ZAMBI

CHIHANDA CHA KULILONGESA :- Tusakwilenu kuli Zambia ha chawana chenye chize keshi kuhasa kuchambujola. 2 Kor. 9. 15.

YIKUMA YA NDONGO

1. Maria yanangisa Isabele.
2. Ungeji wa Maria ni Yosefwe ku Mbeteleme.
3. Chawana cha Zambia, Mwene Yesu Kristu, yamupombesa mu chililo.

MANYONGA

1. Mwene Yesu Kristu wejile hano :-
 - (a) Kusolola zango lia Zambia. Yn. 3. 16.
 - (b) Kulamwina akwa hashi. Mt. 1. 21.
 - (c) Kwonwona yitanga ya Ndiapu.
2. Mwene Yesu Kristu iye Chawana cha Zambia.

Mungelo Gabriele yambulwila Maria ha kutwala kuli musonyenyi Isabele ngwenyi, Musonye Isabele hanaseseka mwana-lunga ha ushinakaji wenyi. Lk. 1. 36.

Kusema mwana chuma chikaluu kuli Isabele se iye mukulwana chikolo, ni Maria, yoze kanda aya ulu, chikaluu kusema mwana alioze kuli Zambia nichimwe masa kenu. Lk. 1. 37. Muze Isabele yevwa kumeneka cha Maria yazala to ni Spiritu Musandu. Hamuwika yachichimicka Zambia. Tala 1 Samuel 2. 1-10.

Hanga Yisoneko yikamanunuke Sesare Augusto yasoneka shimbi yaha ngwenyi, Chatamba atu eswe aswile ku mahio aasoneke. Yosefwe ni Maria yakatuka ku Nazare aye ku Mbeteleme ku mahio. Yaheta ku Mbeteleme, yafupa muhela mu zuwo lia kuzeka ngeji, wakuhi. Mu Mbeteleme Maria yasema mwanenyi mutangu, yamupombesa mu chililo, wa kuvunga mu mahina a ukemba.

Maria ni Yosefwe yevwa kuwaha chinji kupwa ni mwana-kemba. Yamona muli yono mwana ZANGO lia Zambia hali akwa hashi. Yn. 3. 16; 1 Yn. 3. 16. Yamona ULAMWINO wa Zambia hali akwa hashi. Mt. 1. 21. Lk. 19. 10; Mk. 10. 45. Afulielele Liji lia Zambia ngwo, Yono Mwana iye Mesaya, kanda Kristu, kanda mwe Mwana Zambia, yoze Zambia yalakenya eze akalamwine akwa hashi. Yamutambula ni vumbi nikusakwilila Zambia ha chawana chenye. Mwene Yesu Kristu yeza hanga akonwone yitanga ya Ndiapu. Ndiapu uli ni ndundo ya kufwa. Hep. 2. 14. Yakasa akwa hashi mu malenge a shili alioze Mwene Yesu Kristu yeza mu kutusula eswe ku woma wa kufwa ni chiyulo cha Satana.

Chatutamba kulimona vivulumunyi, kanda akwa shili waze katelele zango lia Zambi. Mba kumona zango lia Zambi muze watumine Mwanenvi atufwile ha kulusu, atulamwine ku kufwa ni kuli Ndiapu. Ha kuhinduka mukachi ka afu Mwene Yesu Kristu hakumba kufwa ni Ndiapu. Keshi chiyulo nawa hali waze mafuliela muli Mwene Yesu Kristu. Chatutamba yetu kutambula Mwene Yesu Kristu apwe Chilamwina chetu. Kuchatutambite kufweta mbongo hanji upite umwe, ka. Chatutamba kutambula ulamwino wenyi chawana.

YIHULA

1. Maria wayile mu kumeneka iya?
2. Pande jika ahanjikile?
3. Ku chihunda chika Yosefwe ni Maria ayile aasoneke?
4. Kulihi asemukinyine Mwene Yesu Kristu?
5. Ha yikuma yitatu yika ejile hano hashi?
6. Angelo asolokele kuli aya?
7. Chawana cha Zambi chika?
8. Yika chatutamba kulinga tukapwe ni chawana cha Zambi?

Luka 2. 8-35.

NDONGO 3

KUHALISA CHA ANGELO

CHIHANDA CHA KULILONGESA: Mumu musono, mu limbo lia Ndawichi, Chilamwina kanasemuka kuli yenu, Iye Kristu mwe Mwene.

Luka 2. 11.

YIKUMA YA NDONGO

1. Angelo yasoloka kuli tufunga.
2. Tufunga yawayila mwe Mwana.

(a) Iye Mwana Mutu

(b) Iye Mwana Zambi

(c) Iye Chilamwina cha akwa hashi.

3. Yamuluka jina.
4. Semone yamuningika ngwenyi, Yono Kristu mwe Chilamwina.

MANYONGA

1. Ku Maha Zambi kupema.
2. Shili ya kukwika twanuke kunjilamo.
3. Kristu kakulamwina ku shili.
4. Lie Sango Lipema liapwa kuli eswe.

Tufunga amwene mungelo mwilu. Mungelo yatemuka ni uhenya wa Zambzi. Lk. 2. 9. Tufunga yamuvwila woma wunji. Mungelo yaambulwila Sango Lipema ngwenyi, Musono mu limbo lia Ndawichi Chilamwina kanasemuka kuli yenu, Iye Kristu mwe Mwene. Angelo yamba ngwo, Uhenya kuli Zambzi mwilu mwahiana, ni hano hashi sambukila hakachi ka atu a kumuwahila.

Iye Mwana Mutu—masemuka kuli pwo.

Iye Mwana Zambzi—Spiritu Musandu meza hali yena. 1. 35.

Iye Chilamwina—Iye kumakalamwina atu jenyi ku milonga yo. Mt. 1. 21.

Muze tufunga ewwile sango lino —

- 1 Yika ambile? V. 15. Ngwo, Tuyenu.
- 2 Yika amwene? V. 16. Mwe Mwana-kemba Iye mwe Chilamwina cha akwa hashi.
- 3 Yika alingile? V. 17. Alumbunwine liji lize ewwile hali Yono Mwana.

Tufunga ejile kuli Mwene Yesu. Yamumona, yamufuliela ngwo, Iye mwe Kristu mba yambulwila akwo. Chenacho chatulamba kulinga kwiza kuli Mwene Yesu; kumumona mu ufulielo mba kwambulwila akwo.

Muze Mwana wapwile ni matangwa nake Yosefwe ni Maria yamutwala ku tembele. Yamuluka jina ngwo, YESU. Jina lino linalumbunuka, Chilamwina.

Ku maha Zambzi kupema chikolo. Zambzi katwama mwilu. Ku mahienvi lamba liakuhi; chinyengo chakuhi; yikola yakuhi. Chipwe shili kuyishiko kashika mukwa shili niumwe mahasa kunjilamo. Shili yakukwika mutu kunjila mwilu alioze munubasa kachi munufuliela muli Mwene Yesu Kristu. Iye wanufwilile ha kulusu. Yabinduka mukachi ka afu. Yazezuka mwilu. Mwilu mwali musono. Kanazange ana eswe a hashi eze kuli Iye akapwe Chilamwina cho.

YIHULA

1. Mwe Mwana Zambzi kulihi wasemukinyine?
2. Iya wasolokele kuli tufunga?
3. Sango lienyi lika?
4. Tufunga yika alingile ha kwivwa sango lize?
5. Mukulwana muka wapwile mu tembele?
6. Yika ambile muze amwene Mwene Yesu Kristu?
7. Jina lia Yesu kuchi linalumbunuka?
8. Ku maha Zambzi kupema, nyi kupi?
9. Iya watwama mwilu?
10. Ngwe kuchi twanuke mahasa kuyamo?

LUTONGONOSHI YASOLOKA KU CHIVUMBUKO

CHIHANDA CHA KULILONGESA: Yesu yamba kuli iye ngwenyi, Ye Jila Yami, ni we Umwenemwene, ni we Mwono: ni umwe meza kuli Tata shina ni Yami. Yoano 14. 6.

YIKUKA YA NDONGO

1. Akwa mana a ku chivumbuko yamona lutongonoshi wa
2. Akwa mana mu jila. [Kristu.]
3. Akwa mana yaheta kuli Heronde.
4. Akwa mana yaya ku Mbetelme.
5. Akwa mana yawayila mwe Kristu.

MANYONGA

1. Akwa mana kakululongesa kuwayila—kufulela muli
2. Akwa mana yancha yawana. [Kristu.]
3. Yetu, chatutamba kulibana kuli Kristu.

Muze akwa mana amwene lutongonoshi yanyingika ngwo, Mwe Mesaya—mwe Mwana Zambi hasemuka. Yalongeza yuma yo, kashimbwile, yakatuka ku chifuchi cho nikofupa mwe Mwanangana wa A-Yunda hanga akamwayile. Yakatuka ku chivumbuko kusuku ni kuze Mwana Zambi yasemuka. Mumu ha shili ni ungunungulu ni utanguko twapwa kusuku ni Zambi alioze yoze mamufupa mamuwana Mt. 7. 7. Kanatulongesa KUFUPA mwe Mwana Zambi. Kasongo ko lutongonoshi—O yakaula lutongonoshi chinyingi cha jila. Kasongo ketu—lie Liji lia Zambi. Lutongonoshi watemukine. Liji lia Zambi fapwa Pangu ha molu jetu. Liakutusongwela kuli Mwana Zambi. Samu. 119. 105, 130. Yn. 5. 39. Lk. 24. 27, 44. Hep. 10. 7. Kristu Iye ye Jila. Yn. 14. 6.

Ku Yerusaleme ahulile ngwo, Kulihi ali mwe Mwanangana wa A-Yunda? Chenacho tunahula musono. Kulihi ali? Mu mbunge nyi? Usol. 3. 20. Ef. 3. 17. Muze Kristu mapwa Chilamwina kanda Mwene ni mayula mu mbunge, mutu mapwa ni sambukila ni uwabililo. Mwanangana Heronde valipikala ni chihula chino. Kuchi te? Mumu kazangile Mwanangana mukwo ayule; mumu kafulielele Liji lia Zambi; mumu iye chivulamunyi. Ha kunyonga Kristu yivulamunyi kakulipikala mumu alitunyineye.

Ha kuwana mwe Mwana ku Mbetelme akwa mana yawahilila; yawayila; yakasulula yiteli yo, yachiza yawana ya oru ni libano ni mira.

(a) Oru—Chizulie cha chiyulo cha Kristu.

(b) Libano—Chizutie cha Uzambi wa Kristu.

(c) Mira—Chizulie cha kufwa cha Kristu.

Ila kumona mwe Kristu akwa mana yamwaha yawana. Iye kanazange tumwehe chimwe chuma nawa. Tumwehe yika? Mbunge jetu. Yetwene. Chatutamba kulihana kuli Mwene Yesu Kristu. Chatutamba komufuliela, kumuwayila ni kumulingila. Roma. 6. 13, 12. 11. 2 Kor. 8. 5. Hep. 13. 15.

YIHULA

1. Akwa mana yika amwene mwilu?
2. Lutongonoshi yoze kuchi an lumbunuka?
3. Akwa mana ayile ku Yerusaleme, awanyine Mwene Yesu Kristu kuze nyi?
4. Mu chihunda chika amuwanyine?
5. Yena, hiwawana Mwene Yesu Kristu nyi?
6. Heronde wazangile kuwayila Mwene Yesu Kristu nyi?
7. Yika azangile kumulinga?
8. Akwa mana yika ahanvine kuli Mwene Yesu Kristu?
9. Yawana yo kuchi yinalumbunuka?

Mateu 2. 12-23.

Ndongo 5

MUKWA KOLE WA ZAMBI

CHIHANDA CHA KULILONGESA:- Yenu nuli a kuli Zamb. ana akepe, hinunaakumbu; mumu Yoze uli muli yenu Iye munene wahiana yoze uli hashi. 1 Yn. 4. 4.

YIKUMA YA NDONGO

1. Zamb. yalweza akwa mana mu chilota ngwenyi, Kanda nuhiluka kuli Heronde.
2. Mungelo yasoloka kuli Yosefwe.
3. Yosefwe yatwala Mwene Yesu ni Maria ku Engitu.
4. Heronde yashiha ana eswe a malunga a miaka yiali.
5. Mungelo yanaha liji kuli Yosefwe; yahluka ku Nazare.

MANYONGA

1. Mukwa kole wa Zamb.
2. Majina a Satana.
3. Uputukilo wa shili.
4. Mwene Yesu yakumba Satana ha kulusu.

Muze akwa mana kahilukile ku Yerusaleme, Heronde yatenuka chikolo. Yatuma maswalale kushiha ana akepe eswe a malunga a miaka yiali. Yanyonga kushiha Mwene Yesu Kristu hamuwika alioze Zamb. yamufunga, yamuchi-

nvishina ku chifuchi cha Engitu kusuku ni Heronde. Te Satana hanjila mu mbunge ya Heronde hanga akonwone mwe Mwana Zambzi. Satana te mukwa kole wa Zambzi. Satana kakulimika ni Zambzi. Satana kakufupa kulumbula milimo ya Zambzi ngwe mu munda wa Endene kashika yafupa kwonwona mwe mwana Zambzi.

Hatangu Satana wapwile mungelo mwilu, jina lienyi, Lusefwa. Iza. 14. 12. Yafupa kulipwisa ngwe Zambzi kashika Zambzi kamutayijile kutwama mwilu. Zambzi hamukatwisa mwilu mukwendangana hano. Lk. 10. 18. Iye mukwa kole wa Zambzi ni mutu. 1 Pet. 5. 8. Iye mwata wa andemoniu. Mt. 12. 24. Iye mwata wa chiyulo cha mu tetela. Efwe. 2. 2. Iye mwata wa hano hashi. Yn. 14. 30. Satana kakuhengesa Liji lia Zambzi. Uput. 3. 1, 4. Mt. 4. 6. Kakulimika ni milimo ya Zambzi. ni kukwika kwambujola Sango Lipema. 1 Tes. 2. 18; Mt. 13. 19; 2 Kor. 4. 4. Kakulhipula ngwe mungelo wa pangu. 2 Kor. 11. 14. Iye tato ya maluzi. Yn 8. 44.

Ha kuf'va ha kulusu Kristu yakumba Satana ku miaka veswe. Hep. 2. 14. Muze mutu mafulieta muli Mwene Yesu Kristu makatuka ku chiyulo cha sbili ni cha Satana. Kanda atuhepwise mumu kutwalajalile ha yitaka venyi. 2 Kor. 2. 11; kanda tumwaha chihela. Efwe. 4. 27. Ku ufulielo wetu mutujima mivi yeswe ya mwe chingulungulu. Efwe. 6. 16. Chatamba kuchina muheto wa Ndiapu. 2 Tim. 2. 26; chatamba kulimika ni Ndiapu ni kulizeyca kuli Zambzi, Tiangu 4. 7. Chatamba kulimika nenyi ni kujikiza mu ufulielo. 1 Pet. 5. 9.

Songo lienyi mulipwa mu chitende cha kuyila ni kabia. Usolwelo 20. 10.

YIKULA

1. Mukwa kole wa Zambzi iva?
2. Muze Heronde afupile mwono wa Mwene Yesu, Zambzi watumine Mwanenyi ku chifuchi chika?
3. Jila lia Satana shimbu kanda amukatwisa mwilu lika?
4. Majina jenyi haliapwila aka?
5. Mwe Satana kulibi ali haliapwila?
6. Kulihi meza kumunyasa?
7. Tangwa lika Zambzi wakumbile Satana?
8. Munene iya? Shina Mwene Yesu Kristu nyi shina Satana?
9. Ngwe kuchi mutuhasa kukumba Satana?

MWE MWANA-LUNGA WAPEMENENE KULI ZAMBI

CHIHANDA CHA KULILONGESA:- Ngunawahilila kulinga upale we, Zambia yami. Ewa, shimbi je jinasonewa muchima lia mbunge yami. Samu 40. 8.

YIKUMA YA NDONGO

1. Mwene Yesu, ku tembele.
2. Mwe Mwana-lunga wapemenene kuli Zambia.

- (a) Wazangile zuwo lia Zambia.
- (b) Wazangile Liji lia Zambia.
- (c) Wononokenene kuli Zambia ni kuli yisemi.

MANYONGA

1. Zambia kanazange tumwonokene.
2. Mutu kahashile kupemena kuli Zambia ndo mafuliela Mwene Yesu Kristu.
3. Kristu watufwilile.

Ila kutwala ku wanuke wa Mwene Yesu kutwanyingikine nichimwe shina chize yasoneka mu mukanda wa Lk. 2. 40. «Mwe Mwana watatukile, watakamine mu spiritu, wazalile to ni mana: ni vumbi lia Zambia liapwile hali Iye.» Muze apwile ni kumi lia miaka ni miaka yiali yaya hamwe ni Yosefwe ni Maria ku Yerusaleme akawayile Zambia Tató.

Ha tangwa lia kukatuka ku Yerusaleme Mwene Yesu kakatukile hamwe ni Yosefwe ni Maria, ri akwo alioze yaya ku Tembele—Zuwo lia Zambia. Kashika tuaambe ngwetu, Mwene Yesu:

(1) **Wazangile zuwo lia Zambia.** Chamuwabilila kukunguluka hamwe ni alongeshi ni kwapanjika ni kwahula yihula. Twakuzanga kuya ku zuwo lia Zambia nyi?

(2) **Wazangile Liji lia Zambia.** Yosefwe ni Maria yamuwana kanatwama mukachi ka alongeshi nikwivwa Liji lia Zambia ni kwahula yihula ndo alisukishilile ha malinjekela jenyi ni makumbululo jenyi. Twakuzanga kwivwa Liji lia Zambia nyi? Mutuhasa kwamba ngwe Iye—Samu 40. 8. «Shimbi je jinasonewa muchima lia mbunge yami».

(3) **Wononokenene kuli Zambia ni kuli yisemi.** Muze Yosefwe ni Maria amwijilile wapalumukine hamwe no ku Nazare, yazeyela kuli avo. Talenu Yoano 4. 34 ni 8. 29; Efwe. 6. 1. Shinjila twanuke kuzeyela kuli yisemi ni

makulwana. Mwene Yesu wononokenene kuli Zambzi Tato
nikuya ndusu ndo ku kufwa ha kulusu hanga akafwile
akwa hashi.

Chikwo nawa tunamono kupinda cha Yosefwe ni Maria,
yaya ungeji wa tangwa limuwika, Mwene Yesu keshiko
hakachi ko. Yanyonga ngwo, Tuli nenyi hamuwika alioze
kapwile nenyi tangwa lieswe. Yasala kunyima. Nyi tuna-
zange Mwene Yesu akapwe hamwe ni yetu tangwa lieswe
chatutamba kwiza kuli Iye ha chimene ni kutanga Liji lie-
nyi ni kulemba, chocho mutwivwa tachi jenyi hamwe ni
yetu. Chocho mutwonoka kuli Iye se mutuningika upa-
le wenyi. Chocho mutukumba Satana se tuli nenyi hamwe.

YIHULA
YIULA

1. Mwene Yesu miaka yingahi apwile nayo muze ayile
ku Yerusaleme akawayile Zambzi ?
2. Shimbu lika Yosefwe ni Maria ayile mu jila, Mwene
Yesu wakuhi ?
3. Kulihi amuwanyine ?
4. Yika alingile mu tembele ?
5. Yika ambile kuli naye muze amufupile chocho ?
6. Wazeyele kuli Maria u Yosefwe, nyi ka ?
7. Ngwe kuchi wononokenene kuli Zambzi Tato ?
8. Iya wapemenene kuli Zambzi matangwa eswe ?
9. Ngwe kuchi yetu mutubasa kupemena kuli Zambzi ?

Ndongo 7

Mt. 3. ni 4. 1-11, Mk. 1. 9-13, Lk. 3. 21, 22, ni 4. 1-13.

MWENE YESU MU PUYA

CHIHANDA CHA KULILONGESA :- Liji lie kunalisweka mu mbunge
yami kuchina mungukuvulumuna. Samu 119. 11.

YIKUMA YA NDONGO

1. Yoano yambujola mu puya.
2. Yapapachisa Mwene Yesu mu Yordau.
3. Yeseka Mwene Yesu kuli Satana.

MANYONGA

1. Kukumba shili ni Satana.
(a) Ni kulihana kuli Mwene Yesu Kristu.
(b) Ha kufuliela Zambzi matukwasa.
(c) Ha kwasa ni katana, lie Liji lia Zambzi.

Yoano watetekelele Mwene Yesu nikwambujola kuli atu lie Sango Lipema nikwapapachisa ha kulikonyeka milonga yo. Tangwa limwe Mwene Yesu yasoloka bakachi ko nikwita upapachiso. Yoano kazangile kumupapachisa se Iye Zambi, mwe Mwana Zambi. Mwene Yesu wambile ngwenyi, Chitayize haliapwila mumu chocho chatutamba kumanununa ululi weswe. Ha kututuka mu meya kwapwile chikomokeso. Atu AMWENE Spiritu Musandu nikuhulumuka ngwe katelele nikwiza hali iye. EVWILE liji ngwo, Mwanami Yena, ngunakuzange; muli Yena ngunawabilila chikolo. ASELE CHINYINGI, Yesu, mwana Maria, mwe Mwana Zambi. Ku upapachiso tunamono alatu apwileko: Mwe Mwana Zambi, Mwe Spiritu Musandu, Mwe Zambi Tató.

Esekele Mwene Yesu kuli Satana yisuhó yitatu :-

(a) Usolo wa musunya — Amba mawe ano alumuke mbolo. Mt. 4. 3. Chuma chipema kulia mbolo; shinaho kulinga upale wa Zambi. Shimbi yamuchiali 8. 3. Yn. 4. 34.

(b) Kulenga cha mwono — Ulimbile hashi. Mt. 4. 6. Tala Samu 91. 11. «Mu majila je eswe». Satana wahengesele Liji lia Zambi. Hichapwa upale wa Zambi Mwene Yesu akafwile milonga ya akwa hashi. Satana kazangile akafwe ha kulusu munu kananvingika ngwenyi, Mangokumba.

(c) Usolo wa meso — Yamulweza mawanangana eswe. Mat. 4. 8. ngwenyi. «Fulamana unguwayile» — Chinalite kuwayila alioze kuli umuwika, Iye Zambi.

Ngwe kuchi yetu mutuhasa kukumba Satana ?

1. «Zalenu Mwene Yesu Kristu» Rom. 13 14. Efwe. 6. 11.

2. «Nikufuliela Zambi atukwase». Yunda. 24; 1 Pet. 1. 5.

3. «Ni Liji lia Zambi». Hep. 4. 12; Samu 119. 11; Efwe. 6. 17.

Mwene Yesu wakumbile Satana yisuhó yitatu ngwenyi, Chinasonewa ngwo.

YIHULA

1. Yoze wambujolele mu puya iya ?
2. Mu lwiji muka apapachishile ?
3. Muze apapachishile Mwene Yesu kajila muka wapwile ha mawe wenyi ? Chilayi chika ?
4. Liji lika liatubukile mwilu tangwa lize ?
5. Matangwa angahi Mwene Yesu wapwile mu puya keshi ni kulia ?
6. Iya wejile kuli Mwene Yesu akamweseke ?
7. Yisuhó yingahi wamwesekele ?
8. Iya wakumbile shina Satana, nyi shina Mwene Yesu ?
9. Satana kakutweseka yetu nyi ?
10. Ngwe kuchi mutuhasa kumukumba ?

TUMBAJI ATANGU, CHIKOMOKESO CHITANGU.

CHIHANDA CHA KULILONGESA: - Talenu mwe Mwana-panga wa
Zambi, Yoze machiza shili ya akwa hashi. Yn. 1. 29.

YIKUMA YA NDONGO

1. Yoano ni Andeleu akawile Mwene Yesu.
2. Andeleu vaneha Petulu kuli Mwene Yesu.
3. Mwene Yesu yatambika Filipe. Filipe yanaha Natanele.
4. Mwene Yesu walumwine meya yapwa vinyu.

MANYONGA

1. Tumbaji afulielele muli Mwene Yesu.
2. Chatamba kuncha akwo kuli Mwene Yesu.
3. Mwene Yesu, Iye Ghilamwina, kakutwaha uwahililo ni chiseke.

Ha kumona Mwene Yesu Kristu Yoano wataliki-hile
atu kuli Iye ngwenyi, Talenu mwe Mwana-panga wa Zambi
Yoze machiza shili ya akwa hashi. Andeleu ni Yoano
yakaula Mwene Yesu, yatwama nenyi tangwa lize. Kuchi
chatamba tumbaji alinge ?

1. **Kutala** - Yn. 1. 29, 36. Chuma chitangu chatamba kutala
kuli Mwene Yesu nikumumona ha kulusu Chisalakanyi ha
kufwa ha milonga. Yn. 3. 14-18.

2. **Kukaula** - Yn. 1. 37. Andeleu ni Yoano yakaula.
Yn. 10. 27; 1 Pet. 2. 20-23.

3. **Kwivwa** - Yn. 1. 40. Ewile Liji. Maria neye yatwama
ku molu ja Mwene Yesu nikwivwa Liji lienyi. Lk. 10. 39.

4. **Kufupa akwo** - Yn. 1. 41. Andeleu yanaha kuli Mwene
Yesu :-

(a) yavo Petulu Yn. 1. 41.

(b) Mwana-lunga ni kulia chenvi. Yn. 6 8;

(c) A-Helase amwe. Yn. 12. 22; Chatutamba kuncha akwo
kuli Mwene Yesu Kristu.

5. **Kutwama nenyi**. Yn. 1. 39; Yn. 14. 23; Lk. 10. 38-42.

Mwene Yesu wayile hamwe ni tumbaji twenyi ku Kena
ku umbachiso. Muze ahetele naye ngwenyi, Kanahono vinyu.
Vinyu va kuhanjika ha chiseke. Ahonene chiseke ku umbachiso.
Chiseke cha hashi kuchishi kutinduluka. Kulenga, ni upite,
ni ndundo, ni ulemu, yino yuma yeswe ya kupalika mba mutu
matwama mokomoko. Kristu wapwileko muli Iye muchili
chiseke cha mutolo. Samu. 16. 11. -Uwahililo wamwenemwene
mutu mauwana muli Zambi wika.

Rm. 15. 13.

Yn. 2. 5. Cheswacho mamba; lingenu — Kristu kuchi; kakwamba?

1. Hali mutu — mutu kuchi apwa? Mk. 7. 21 — Iye chivulumunyi.

2. Yika anahono. Yn. 3. 3 — mwono waha — chatamba, kusemuka m'wili.

3. Zango' lia' Zambi. Yn. 3. 16 — Wechele Mwanenyi wa wika.

4. Kristu wasalakanyine chivulumunyi ha kufwa.

Yn. 3. 14; Mk. 10. 45; Yn. 10. 11. 17, 18.

5. Ulamwino. Yn. 10. 9; 14. 6. Ulamwino wapwa wamwe-nemwene kuli mweswawo mafuliela. Yn. 5. 24; 10. 27-30.

6. Songo' lia' chivulumunyi. Yn. 8. 24; Mk. 9. 43-48.

Chiseke ni uwahililo wa hashi wa kuya ni kutepuluka alioze chiseke ni uwahililo wa Kristu wa kuya ni kutoha. Ku chikomokeso chino Mwene Yesu waputukile kusolola uzambi wenyi. Tumbaji achimwene, amufulielele ngwo, Yono mwe Mwana Zambi.

YIKULA

1. Kuchi Yoano Chipapachisa wavulukile Mwene Yesu?
2. Malunga aze aali akawile Mwene Yesu aya?
3. Kuli iye wambulwile sango lipema ngwenyi, Hitunawane Mesaya?
4. Mesaya kuchi chinalumbunuka?
5. Iya watambikile Natanele?
6. Kuchi Natanele wambile hali Mwene Yesu?
7. Muze mutufuliela muli Mwene Yesu yika chatulamba kulinga?
8. Yika Mwene Yesu walingile ku umbachiso?
9. Yika Mwene Yesu waputukile kusolola muze alumwine meya apwe vinyu?

Yoano 2. 13-25; Yoano 3. 1-21.

Ndongo 9

MWENE YESU YAPEMESA TEMBELE. YAHANJIKI NI NIKONDEMU

CHIHANDA CHA KULILONGESA: Chamwenemwene, chamwenemwene ngunambe kuli yena ngwami, Mutu kahashile kumona wanangana wa Zambi shina masemuka kwilu. Yoano 3. ?.

YIKUMA YA NDONGO

1. Mwene Yesu wayile ku tembele ku Yerusaleme.
2. Mwene Yesu watuhwishile akwa kulanjisa.
3. Mwene Yesu Kristu wahanjikile ni Nikondemu.

MANYONGA

1. Kupwa mtwata wa Zamboni chatamba kusemuka kwilu.
2. Kusemuka chaha, chakwiza ha kufuliela muli Mwene Yesu Kristu akapwe Chilamwina.
3. Mijimba ya akwa kufuliela yapwa tembele ya Zamboni kasbika chatamba kuyifunga.

Kamuwika ha mwaka A-Yunda apwile nikuya ku Yerusalem mu kuwayila Zamboni ni kulambula yitapo. Muze Mwene Yesu yaheta ku Tembele choji chinji chapwilemo. Chamuvwishile chinyengo chinji ha kumona zuwo lia Zamboni ngwe chitanda. Yahosa muhipu, yanjila mu tembele yaaluhwisa ni akwa kusumbakenya mbongo ni ngombe, ni mapanga ni membe, ngwenyi, Kanda nupwisa zuwo lia Tata ngwe chiywenge cha mihuza. Muze asasendote afupile kunyingika chiyulo chize alingile nacho, ngwenyi, Onwenu tembele yino, mba ha matangwa atatu mungukayihindwisa.

Mwene Yesu walukile mujimba wenyi ngwenyi, Tembele. Etu hitwafuliela muli Mwene Yesu, ni mijimba yetu tembele nawa. 1 Kor. 3. 16. Yika yili mu tembele jenu? Hanji mahuzi, hanji maliji api, hanji matuka, hanji sau, hanji kaleleso — Mwene Yesu mazanga kutwamamo? Kechi kuhasa. Chatamba kupemesa tembele jenu ha kufuliela mu manyinga a Mwene Yesu Kristu.

Umwe Ka-Fwariscu, Nikondemu, yeza kuli Mwene Yesu ufuku nikwamba ngwenyi, Yena uli longeshi unakatuka kuli Zamboni. Mwene Yesu yanyingika mbunge yenyi kashika yamba ngwenyi, Mutu kahashile kumona wanangana wa Zamboni shina masemuka kwilu. Kuchi chinalumunuka kusemuka kwilu?

1. Mutu muli iye mwene kahashile kumona chipwe kunjila mu wanangana wa Zamboni. Iye kapuputa ku yuma yize va uspiritu mumu kahashile kwononoka chipwe kunyingika chipwe kupemena kuli Zamboni.
2. Kusemuka chaha kuchapwile kwalumuna mbunge yikulu alioze chapwa chitanga chaha muli Spiritu. Mukulu mafwa, mwaha masemuka. A-Rom. 6. 6; 2 Kor. 5. 17.
3. Kusemuka chaha chakwiza ha kufuliela muli Mwene Yesu Kristu amuhachilile ha kulusu. Yn. 3. 14, 15.
4. Ha kusemuka chaha mukwa kufuliela kakutambula mwono waha muli Kristu ni mwe Spiritu Musandu akamulongese yama yeswe ya uspiritu ni akamusongwele mu jila ya Zamboni.

1. Yika Mwene Yesu wawanyine mu tembele ku Yerusalem?
2. Muze hachimona kuchi ewwile mu mbunge?
3. Mwene Yesu Kristu kuchi alingile?
4. Asasendote kuchi amuhulile?
5. Kuchi Mwene Yesu Kristu walukile mujimba wenyi?
6. Mijimba yetu kuchi yapwa?
7. Nyi mijimba yetu muyipihani ungunungulu, ni uhulia Mwene Yesu mahasa kutwamamo?
8. Iya wejile kuli Mwene Yesu Kristu ha ufuku?
9. Yika afupile?
10. Ngwe kuchi Mwene Yesu amukumbulwile?
11. Kuchi chatutamba kulinga tutambule mwono wa mutolo?

Yoano 4. 1-30, 39-42; 7. 37, 38.

Ndongo 10

SHIMA LIZE KULICHI KUSHIKIWA

CHIHANDA CHA KULILONGESA: Alioze mweswawo manwa meya aze mungumwaha Yami, kechi kevwa pwila nichimwe ku miaka ya mutolo; alioze meya aze mungumwaha kumakapwa muli iye fuji lia meya lia kuvwelwoka ku mwono wa mutolo. Yoano 4. 14.

YIKUMA YA NDONGO

1. Mwene Yesu yahwima ha shima lia meya ku Samaria.
2. Pwo, Ka-Samaria yeza mu kutaha meya.
3. Mwe pwo yafuliela Mwene Yesu ngwenyi, Iye Mesaya.

MANYONGA

1. Pwo, Ka-Samaria chivulumuanyi.
2. Mwene Yesu yamulakenya kumwaha Meya a mwono.
3. Mwe pwo ha kumufuliela yanaha akwo kuli Iye.

A-Yunda ni A-Samaria keshi kuliendela nilimwe tangwa kashika yoze pwo wakomokene muze Mwene Yesu amwichele meya. Mwene Yesu wambule ngwenyi, Kachi yena wanyingika chawana cha Zambini Yoze unambe kuli yena ngwenyi, Ngwehe kama meya ngunwe; kachi wamwita ni kachi makwaha meya a mwono. Mwene Yesu yalakenya pwo chawana. Chawana chika? Mwono wa mutolo. Rom. 6. 23. Kuchi te yamulakenya ulamwino? Mumu kapwile nawo. Iye chivulumuanyi kanahono uhenya wa Zambini Kanatoko mu shili yenyi. Ni yetu chizechene tunatoko ni tunahono. Roma 3. 23. Kuchi Mwene Yesu machiza shili

yetu? Mahasa mumu Iye watufwilile ha kulusu. Iye watusalakanyine ha kufwa. Yn. 7. 37. Kanalakenya chawana. Mutu kakufweta chawana nyi? Ngwami, Ka. kakutambula lume. Pwo yazanga meya aze alioze Mwene Yesu yazanga pwo até ngwenyi, Nguli chivulumunyi kashika hasolola ungunlungulu wa pwo (Yn. 4. 16-18) ni pwo yamumona ngwenyi, Au profweta se hanyingika ni manyonga jenyi, ni maliji jenyi ni yitanga venyi veswe. Pwo yaputuka kughanjika ha kutwala kuli Mesaya. Mba Mwene Yesu yamba ngwenyi, Mesaya Yami Mwene. Chocho pwo yamufuliela ngwenyi, Iye Mesaya, mwe Kristu. Pwo wapwile chivulumunyi alioze ba kushikisa milonga yenyi kashika yahasa kutambula chawana cha Zambini — e meya a mwono. Muze hamufuliela yaya, ni kwambulwila akwo mu chihunda. Chenacho chatutamba kulinga. Nyongenu Andeleu Yn. 1. 40-41 — yaya kuli yayo. Filipe yaya kuli Natanele Yn. 1. 45. Yono pwo yaya kuli makulwana mu chihunda. Yn. 1. 28. Kayile ni khangujola alioze ni maliji akepe, ngwo, litunawane Mesaya. litunawane Yoze asonekene Mose, ... Tweyenu nukamumone ... yono mwe Kristu nyi? Yn. 4. 29. Mwene Yesu yalongesa pwo umuwika iye chivulumunyi chocho chihunda cheswe yafuliela ngwo, Yono chamwenemwene mwe Kristu, mwe Chilamwina cha akwachshi. Yn. 4. 42. Akwa Kristu eswe chipwe twanuke akwete kupwa akwa kwambulwila akwo.

YIHLLA

1. Kulibi Mwene Yesu ahwiminyine ?
2. Iya watuhukile mu chihunda ?
3. Yika Mwene Yesu amwichile ?
4. Sango lika pwo wevwile kuli Mwene Yesu ?
5. Ha kumufuliela ngwe Mesaya, pwo yika walingile ?
6. Etu yika chatutamba kulinga ?

Yoano 4. 46-54; Luka 4. 16-31. Ndongo II
YESU YAWUKA MWANA WA CHILOLO

CHIHANDA CHA KULILONGESA: Alioze kuli waze eswe amutambwile wahanyine chiyola cha kupwa ana a Zambini, te kuli waze a kufuliela ku jina lienyi. Yoano 1. 12.

YIKUMA YA NDONGO

1. Mwana chilolo wayijile.
2. Mwene Yesuwambujolele ku Nazare.
3. litunyineye.

1. Shili yapupuchishile A-Yunda.
2. Nyi atu kechi kutayiza shili yo, Mwene kechi kuhasa kwalamwina.
3. Kutambula Mwene Yesu akapwe Chilamwina chapwa ulamwino.

Mwe Mwana—Chi. 46 wavijile—chizulie cha shili. Wambile kufwa—Roma 6. 23; Yn. 3. 36. Tunambe kufwa mu shili ni milonga yetu. Mwana wa chilolo—Kuyiza ni yikola; ni chinyengo ni kufwa chakwiza kuli eswe. Kuchishi kalonde.

Tato ya Mwana—Chi. 47 **Wevwile** hali Mwene Yesu mumu lufuma wa Mwene Yesu yaheta mu yituchi veswe. **Wafupile ni Wejile**—Chi. 47 kuli Mwene Yesu Kristu. Mt. 7. 7; Fupu nu mba kumunuwana. Mt. 11. 28. **Waliumbile**—Chi. 47 ni vumbi ni kulikehesa ngwenyi, Tweya unguhindwishile mwanami. Mwene Yesu kayileko alioze wambile ngwenyi, Yako, mwané ni mwono ali. Chilolo **Wafulielele**—Yi. 50, 53, ku liji lia Mwene Yesu. Yakatuka, yahluka ku zuwo. Mu jila ndungo jenyi yamupátwiza ngwo, Mwané ni mwono ali. Chilolo **Wanyingikine**—Chi. 53 Mwene Yesu wawukile mwana kashika wamufulielele ngwenyi, Iye mwe Mwana Zambí.

Mwene Yesu yeza ku Nazare. Yanjila mu sunangonga. Yakatuka, yatanga, yatwama mba yaputuka kwalongesa. Atu yalikomokena ha maliji aze a vumbi atuhukile mu kanwa lienvi mba yazala to ni ufwatulo, amumbilile haze lia limbo. Akwa chijima chenyi yalituna Mwene Yesu Kristu, mwe Mwana Zambí.

Kuno tunamono chizulie cha mbunga jiali. Mutangu yoze wevwile hali Mwene Yesu amufupile, walikehesele nikutayiza milonga yenyi mba yafuliela Mwene Yesu. Yamunyingika ngwenyi, Iye Chilamwina chami. Ku Nazare kwivwa yevwa liji lienyi lia vumbi alioze kalikehesele ni kutayiza milonga yo alioze azalile to ni ufwatulo, alitunyine mwe Chilamwina cho. Enu? Yika munulinga ni mwe Mwana Zambí?

Shili yakupupuchisa atu. Mwene Yesu kechi kulamwina voze kasolo kutayiza shili yenyi ni kuyishikisa. Yoze kanafupu ulamwino mauwana ha kutambula Mwene Yesu kupwa Chilamwina chenyi. Waze kasolo kufuliela muli mwene Yesu mafwa ni milonga vo. Yn. 8. 24. Waze eswe amutambwile waahale chiyulo cha kupwa ana a Zambí. Yn. 1. 12.

YIHULA

1. Mwana waya wayijile?
2. Kuli iya ayile amuhindwise?
3. Mwene Yesu Kristu wayile ku zuwo lia chilolo nyi?
4. Yika ambile kuli mwe chilolo?
5. Chilolo wamufulielele nyi ka?
6. Waze kamufulielele aya?
7. Mbunga jingahi jili kumeso ja Zambiri?
8. Ku mbunga yika watwama?
9. Waze mafwa ni milonga yo aya?
10. Waze mafuliela kuchi mapwa?

Luka 5. 1-11; 27-29. Luka 6. 12-16. Ndongo 12
MWENE YESU YATAMBIKA TUMBAJI

CHIHANDA CHA KULILONGESA :- Tweyenu kunyima Yami, mungunu-
pwisa akwa kutela atu. Mateu 4, 19.

YIKUMA YA NDONGO

1. Mwene Yesu ni akwa kutela yishi awana.
 - (a) Yoza yishi anji.
 - (b) Mwene Yesu yatambika tumbaji.
 - (c) Tumbaji yamukaula.
2. Mwene Yesu yatambika kumi lia tumbaji ni tumbaji aali.
3. Mwene Yesu yatambika Mateu amukaule.

MANYONGA

1. Mwene Yesu kanazange ana-mapwo ni ana-malunga apwe akwa kumukaula.
2. Kanazange kupwa Chilamwina kanda Mwene wo.

Tangwa limwe Mwene Yesu wapwile ku chitende cha Ngalileya nikulongesa mbunga ya atu. Te kanamushinjeka, kahashile kumana kanawa. Yamonu wato wa Semone, yamanamo chocho yahasa kulongesa kanawa. Muze te hamanununa kulongesa yamba kuli Semone ngwenyi, Senva kulutwe nutele manda jenu nukoze. Akwa kutela yishi hakilikita ufuku weswe muze Mwene Yesu keshiko hamwe no, kozele niumwe alioze ha liji lia Mwene Yesu yatela manda jo, yoza chizavu chinene cha yishi. Nyi ufufiela wakuhi kutwahashile kupemena kuli Zambiri. Hep. 11. 16; Nyi zango liakuhi kufumbuka chakuhi. 1Kor. 13. 1-3;

Nyi Liji lia Zambzi liakubi, pangu kulishiko. Izaya 8. 20; Nyi mwono usandu wakubi kulishimwinya ni Zambzi kuchishiko. Ilep. 12. 14; Nyi Kristu kapwile Mwene wa mbunge jetu, mihuko ya Spiritu yakubi. Yn. 15. 5. Ha ufuku tumbaji kapwile ni Mwene Yesu hamwe no, kozele niuwwe. Ha mwalwa ha liji lienyi ozele anji, Nyi kutwawpwe nenvi kutwawashile kulinga nichimwe, kutwawashile kwima mihuko. Ku mihuko ya Spiritu atu manyingika kachi tuli nenvi mu mbunge.

Mwene Yesu watongwele akwa kutela yishi, akwa kufwetesa lijimu ni akwo hakachi ka yiswale a hashi hanga aalongese, akaye mu kwambujola Sango Lipema. Chizechene kakutambika ana-mapwo ni ana-malunga matangwa ano akeme mihuko ya Spiritu, akapwe akwa kumulingila. Ngwenyi, Tayizenu ana akepe eze kuli yami ni kanda nwakanjisa: mumu wanangana wa Zambzi wa wano ene. Mk. 10. 14.

Tangwa likwo Mwene Yesu watuhukile, yamona mukwa kufwetesa lijimu, jina lienyi, Levi. Kanatwama mu zuwo lia kutambwila lijimu. Yamba ngwenyi, Ngukaule. Chocho Levi yehuka yeswe, yakatuka, yamukaule.

Shimbu Mwene Yesu kanda atongola tumbaji kumi ni aali yakanduka ku mulundu mu kulemba, yapwako ufuku weswe nikulemba kuli Zambzi. Tulilongese kuli Mwene Yesu Kristu. Kanda tweseka kulinga milimo ya Zambzi ukawetu ndo ni kutemba kuli Iye.

Longesa twanuke majina ja kumi lia tumbaji ni tumbaji aali. Lk. 6. 14-16.

YIHULA

1. Ku chitende chika Mwene Yesu wupalikile?
2. Mu wato waya anjilile?
3. Muze Mwene Yesu wamanunwine kulongesa atu yika ambulile Semone?
4. Muze wononokene ku liji lia Mwene Yesu chipupu chika chapwileko?
5. Mwene Yesu watambikile mukwo amukaule, iya?
6. Kanatutambika yetu nyi ka?
7. Tukalinge yika?

PANGU LIA MWONO.

CHIHANDA CHA KULILONGESA: Yami nguli lie Pangu lia hashi; yoze wakungukaula, kechi kenda mu milima, alioze kumakapwa ni pangu lia mwono.

YIKUMA YA NDONGO

1. Mwene Yesu yawuka mieji.
2. Mbatimeu yevwa lufuma wa Mwene Yesu.
3. Mwene Yesu yapalika mu Yeriku; Mbatimeu yamutambika.
4. Mwene Yesu yawuka Mbatimeu mumu ha ufulielo wenyi.
5. Atu eswe yachichimfeka Zambzi.

MANYONGA

1. Mwene Yesu yalinga chikomokeso chino hanga atu afuliele ngwo. Iye Zambzi.
2. Mwene Yesu Iye Pangu lia hashi.
3. Waze kanda afuliela kapwa tupuputa ha milonga yo; kabashile kuwana jila ya kuya kuli Zambzi.
4. Chatamba kufuliela muli Mwene Yesu Kristu.

Mbatimeu wapwile kapuputa Chi. 46 — kamwene mitondo ni yitemo ni yuma yikwo yipema hano hashi, Iye chizulic cha mukwa shili yoze kahashile kumona Kristu, ni ulamwino, ni kusemuka chaha, ni kupwa ni sambukila ni Zambzi, ni kumona yuma yize yikwo yipema ya mwilu. 2 Kor. 4. 4; 2 Pet 1. 9; Yn. 3, 19, 20; Efwe. 4. 18. Wapwile chiswale — mukwa kuunjila. Mukwa shili neye yahona mwono ni mazalo a ululi. Akwete kutambula kuli mukwo, Iye Mwene Yesu Kristu.

Mwene Yesu Kristu kapalikile nawa ku Yeriku. Mbatimeu kapwileko ni tangwa likwo kulaula ku meso. Mukwa shili mweswe kali ni tangwa lia kusula kwivwa Sango Lipema. Nyi kakololokele tangwa lize kachi kamwene nilimwe tangwa. Yishima 27. 1; 29. 1.

Mbatimeu yafuliela ngwenyi, Yesu Ka-Nazare Iye Mwana Zambzi. Yafuliela ngwenyi, Mahasa kunguwuka kashika yakololoka nikutambika Mwene Yesu. Mwene Yesu kakwivwa mweswawo makololoka kuli Iye ni ufulielo. Mwene Yesu yamuhula ngwenyi, Kuchi unazange ngukulingile. Ngwenyi, Ngulaule ku meso. Mbatimeu kafupile upite hanji ulemu wa hashi alioze amone. Yetu yika tunazange shina upite ni ulemu wa hashi nyi shina kumona Mwene Yesu Kristu lie Pangu lia hashi? Yn. 3. 19-20. Hamulawisa meso hanga akwo ni kuchimona amufuliele.

Tangwa lize Mbatimeu wamwene pangu. Wamwene lie Pangu lia hashi. Mwene Yesu Iye lie Pangu lia hashi. Yn. 8. 12. Mbatimeu wendele matangwa eswe mu milima pwi alioze ha kwiza kuli Mwene Yesu yamona pangu. Mbatimeu chizulie cha atu anji hano hashi. Hapwa ngwe tupuputa. Kanende mu miliina mumu kanda afuliela miuli Mwene Yesu Kristu. Mumu shili yo yaapupuchisa kamwene jila yize anayi. Tweyenu ku pangu- lie Pangu lia hashi. Amba ngwe yoze kapuputa mukwo mu Yn. 9. 25 wambile ngwenyi, Chuma chimuwika ngunanyingika; napwile kapuputa, haliapwila ngunamono.

YIHULA

1. Yoze watwamine ku sesa lia tapalo ni kuunjila iya?
2. Mu chihunda chika atwamine?
3. Yika alingile Mbatimeu muze wevwile liji ngwo, Mwene Yesu Kristu kanapatika.
4. Kuchi te Mwene Yesu Kristu wamuwukile?
5. Etu, tuli tupuputa nyi ka?
6. Chatutamba kulinga yika?
7. Lie pangu lia hashi, iya?
8. Waze kanda afuliela kakwenda mu milima nyi mu pangu?

Luka 8. 41-56; Marku 5. 22-43.

Ndongo 14

YAHINDWISA MWANA-PWO KU KUFWA

CHIHANDA CHA KULILONGESA: Yesu wambile Luli iye ngwenyi, Yami nguli we ubindikilo ni we mwono: yoze mafuliela kuli Yami, chipwe mafwa, hindu kumakapwa ni mwono.

YIKUMA YA NDONGO

Yoano 11. 25.

1. Yaru yava kuli Mwene Yesu amukwase.
2. Mwene Yesu kavile fuji ku zuwo lienyi.
3. Yawuka pwo mu jila.
4. Chipupu—Mwene Yesu Kristu yahindwisa mwana-pwo wa Yaru.

MANYONGA

1. Yetu tuli fu mu shili.
2. Mwene Yesu kakuhindwisa waze hafwa mu shili ni kwaaha mwono.
3. Twakutambula mwono wa mutolo ha kufuliela muli Mwene Yesu Kristo.

Yaru wapwile mukwa kuyula sunangonga. Yevwa chinyengo. Yalikehesa, yafulamana hashi ku molu ja Mwene Yesu. Yaliumba ngwenyi, Tweya ku zuwo unguhindwishile mwanami wa pwo kanambe kufwa. Mt. 9. 18. Mbunga yakaula, yakwika Mwene Yesu kuya fuji ku zuwo lia Yaru.

Mwana-pwo wa Yaru wayijile mba yafwa. Iye chizulie cha akwa hashi. Tuli afu mu shili ni milonga. Chize mutuhasa kulinga kulilamwina hanji kutwama ni mwono chakuhi.

Mu jila umwe pwo yoze wayijile kumi lia miaka ni miaka yiali, yaya kuli Mwene Yesu, yasa minwe ku lupula wa mazalo jenvi, yahinduka haze hene. Yoze pwo wapwile mukwa luchisa mumu ha musongo wenyi. Kamutayijile kutwama hamwe ni akwo. Ulevi 15. 19, 20. Yevwa yikola yinji. Mk. 5. 26. Yahwisa mbongo jeswe ku mbuki ni waze kahashile kumukwasa. Tala Lk. 15. 14-20. Roma 3. 22, 23. Kapwile ni kutalatala cha kuhinduka.

Akwa hashi kanapu akwa luchisa kumeso ja Zambi mumu ha shili mu mbunge jo. Katelele kutwama mwilu. Kutalatala chakuhi kukatuka ku tachi ja Satana. Pwo yeza ni ufulielo kuli Mwene Yesu Kristu, yahinduka ku yikola yenyi; yatambula mwono waha. Chizechene ni akwa hashi musono, waze hafwa mu shili ni milonga, kachi meza kuli Mwene Yesu Kristu maahindwisa haze hene. Maaha mwono waha wa mutolo.

Liji yiliheta kuli Yaru ngwo. Mwana-pwo hafwa, alioze Mwene Yesu yamba ngwenyi, Kanda wivwa woma, fuliela lume, kumakamupwisa mungunu. Yeza ku zuwo ngwenyi. Kanda numulilila, mu tulo ali. Yanjila mu zuwo Iye ni Petulu ni Yoano ni Tiago ni tato ni naye. Yamukwata ku kwoko ngwenyi, Mwana hinduka. Yahinduka haze hene. Yamwaha kulia.

Tuli afu mu shili ni milonga. Alioze ha kwiza kuli Mwene Yesu ni ufulielo matupwisa angunu. Matuhindwisa mukachi ka afu. Mba mutulia kulia chize cha Spiritu. 1 Pet. 2. 2. Kulia cha mwono wa mutolo. Nyi nunazange mwono wa mutolo fulielenu mwe Mwana Zambi, Mwene Yesu Kristu.

YIHULA

1. Lie jina lya mukwa kayula sunangonga iya?
2. Yoze wayijile iya?
3. Kuli iya ayile amuwuke?
4. Waze Yesu Kristu atwalile mu zuwo aya?
5. Yika aliagile kuli mwana?
6. Yika wambile kuli iye?
7. Wamuhindwishile nyi ka?
8. Yetu tuli afu nyi tuli amwono?
9. Iya mahasa kutuhindwisa?
10. Ngwe kuchi matuhindwisa?

Mt. 14. 13-21; Mk. 6. 30-44; Lk. 9. 10-17; Yn. 6. 1-14.

MBOLO YA MWONO

CHIHANDA CHA KULILONGESA :- Yami nguli ye Mbolo ya Mwono ; yoze meza kuli Yami kechi kevwa zala nichimwe, ni yoze mafuliela kuli Yami kechi kevwa pwila nichimwe ha mwaka niumwe. Yoano 6. 35.

YIKUMA YA NDONGO

1. Mwene Yesu yakatuka ni tumbaji twenyi, yaya ku puya.
2. Mbunga yakaula hashi. Yamuwana. Mwene Yesu waalongesela.
3. Chipupu cha kulisa tununu atano.
 - (a) Tumbaji ngwo, Eche aye ku mahio.
 - (b) Mwene Yesu yamba ngwenyi, Ahenu kulia.
 - (c) Andeleu yawana kanuke ni mbolo jitano ni yishi aali.
 - (d) Mwene Yesu yatambula mbolo ja kanuke, yalisa najo tununu atano.

MANYONGA

1. Kutwama ni mwono chatamba kulia.
2. Mwene Yesu Iye Mbolo ya Mwono. Liji lienyi kulia cha alma jetu.
3. Tumbaji ahanyine mbolo ku mbunga.
4. Chatamba kuhana mbunge jetu kuli Mwene Yesu ni kushindakenya kuli akwo.

Kutwama ni mwono hano hashi chatamba mutu akalie. Nyi kulia chakuhi mafwa. Ku yihanda yino tunatange ngwo, Mwene Yesu walishile tununu atano a atu ni mbolo jitano ni yishi aali. Eswe akuchile, Niumwe wasalileho wakuhi. Nyi yetu tunazange kutwama ni mwono wa mutolo chatufamba kulisa alma jetu ni mbolo ya mwono. Mwene Yesu ngwenyi, Yami nguli Mbolo ya Mwono. Yn. 6. 35 Yoze meza kuli Yami kechi kevwa zala nichimwe. Keshiko yoze matuvukisa shina Mwene Yesu wika, Chatamba kul sa alma jetu tangwa ni tangwa ni kutanga Liji lia Zambzi, chocho kutuchi kwivwa zala.

Yoze wahanyine mbolo kuli Mwene Yesu, kanuke. Wahanyine cheswe apwile nacho kuli Mwene Yesu. Kuchapwile chuma chinene. Nyi kachi jasalile mu moko ja kanuke mbolo ya kukuchisa kanuke wika alioze mu moko ja Mwene Yesu Kristu mbolo jize jitano jokele, alishile najo tununu atano a malunga. Chize tuli nacho chikehe, chamokomoko, alioze ha kuhana mbunge jetu kuli Zambzi

miba hitwahana cheswacho tuli nacho kuli Iye, malinga nacho yipupu. Malisa tununu ni Liji lienyi nyi mutuhana mbunge jetu ni makanwa jetu kuli Iye.

Mwene Yesu muze te hasakwila mbolo, wayipalwile, wayihanyine kuli tumbaji; o atwale kuli atu. Chizechene ndo musono Mwene Yesu kanafupu waze matwala Liji lienyi kuli waze anevu pwila ni zala. Iya malihana kuli Mwene Yesu kupwa mukwa kuvumbika, mukwa kutwala Liji kuli waze kanatoko mu shili yo ni milonga yo?

YIHULA

1. Tumbaji angahi Mwene Yesu Kristu apwile no?
2. Yoze wahanvine mbolo jitano ni yishi aali kuli Mwene Yesu Kristu iya?
3. Mwene Yesu Kristu yika alingile ni mbolo jize?
4. Atu angahi alile mbolo tangwa lize?
5. Mbolo jimwe jasalile nvi ka?
6. Ye Mbolo ya Mwono iya?
7. Yika chatutamba kulinga kupwa ni Mbolo ya Mwono?

Mt. 8. 23-27; Mk. 6. 45-52; Yn. 6. 15-21. **Ndongo 16**

MWENE YESU, MWENYA FUJI NI MEYA

CHIHANJA CHA KULILONGESA: Alioze yamba kuli ayo ngwenyi, Yami mwene; kanda nwiwa woma. Azangile kashika kumutambula mu ulungu. Yoano 6. 20, 21.

YIKUMA YA NDONGO

1. Mwene Yesu yalemba ukawenzi ha mulundu.
2. Tumbaji yapinda ni mikanya, mumu fuji yalimikine no.
3. Mwene Yesu yenda ha meya.
4. Tumbaji yamunjisa mu ulungu.

MANYONGA

1. Mwene Yesu mwilu mwali ku chindume cha Tato.
2. Akwa Kristu kakupinda ni yipikalo ni lamba ni yihungumiona va haao hashi.
3. Mwene Yesu chipwe mwilu kakumona ana jenyi ni kakwiza kuli ayo nikuliendela no.
4. Kunyingika tuli hamwe ni Mwene Yesu chakuholesa mwongo ni woma wa mu mbunge jetu.

Mwene Yesu walingile chipupu chinene nikulisa tununu atano a atu. Washinjikite tumbaji twenyi anjile mu wato

azauke. Iye mwene wakandukile ha mulundu mukulemba, wapwileho ufuku weswe nikulemba nikushimwinya ni Tato. Chipwe wapwile ha mulundu kusuku **Wamwene** kupinda cha tumbaji twenyi ha chitende. Hano hashi kupinda hichili mumu ha shili. Mwene Yesu Kristu Chilamwina chetu, mwilu ku chindume cha Tato Zambi kanamono kupinda chetu ni kulisakalisa chetu. Tunambe kutoka hanji kushimbama mumu yuma ya hashi yinatushate. Tunalikoleza, tunalitachika alioze kwiywa ngwe kutwasenyene kulutwe. Mwene Yesu Kristu **wayile** kuli ayo nikwenda ha meya. Mwene wetu kanatukundama mu kupinda chetu, mu lamba lietu, alioze kanji kanji ngwe tumbaji kutwamumwene kanawa, kutwamuningikine. Ngwe waze aali ayile ku Emeu kulutwe lia kuhinduka chenye. Lk. 24. 13-35. Chi. 15—Yesu mwene wakundamine. Chi. 16—Meso jo ajika, kamuningikine mumu ha chinyengo cho. Chi. 31—Amuningikine ha kupalula mbolo. Mbolo chizulie cha Liji lia Zambi. Mutumuningika ha kutanga Liji lienyi. Chi. 33—Ahilukilile ku Yerusaleme ni uwahililo. Mwene Yesu **wambile** ngwenyi, Yami mwene, kanda nwiwya woma. Tumbaji ewile liji lienyi ni ha kumuningika amunjishile mu wato ni uwahililo. Mwene Yesu waholesele fuji ni meya. Chizechene ni yetu muze mututayiza Mwene Yesu Kristu, kuhwima chinji chili mu mbunge jetu. Kechi kutuhichika nilimwe tangwa. Hep. 13. 5.

VIHULA

1. Muze Mwene Yesu washikile atu kulibi ayile?
2. Tumbaji twenyi kulibi apwile?
3. Shimbu machizauka yika yapwile ha chitende?
4. Yoze wendele helu lia meya lya?
5. Muze tumbaji akololokele ni woma yika ambile?
6. Anjishile Mwene Yesu Kristu mu ulungu nyi?
7. Yetu kuchi chatutamba kulinga?
8. Nyi tuli ni Mwene Yesu mu mbunge jetu mulutoka nyi?

Ndongo 17

Mat. 16. 13-16, 21; 17. 1-9, 22, 23; Mar. 8. 27-31;
Mar. 9. 1-10, 30-32; Luk. 9. 18-22, 27-36, 44, 45.

MWE MWANANGANA WA UHENYA

CHITHANDI CHA KULILONGESA: Yono mwe Mwanami, ngunamuzange chikolo, muli Iye ngunawahilila; Mwiwenu. Matem. 17. 5.

YIKUMA YA NDONGO

1. Tumbaji yatayiza Mwene Yesu ngwo, Iye mwe Mwana Zambi.

2. Mwene Yesu yaprofeteza kufwa chenyi.
3. Mwene Yesu wayile ni Petulu, Tiangu ni Yoano ku mulundu, yalumuka kumeso jo.
4. Mose ni Eliya yasoloka nikuhanjika ni Mwene Yesu.
5. Petulu yahanjika.
6. Mba Zambini yakumbulula mu lelwa.
7. Mwene Yesu yaprofeteza nawa kufwa chenyi ni ubi-ndukilo wenyi.

MANYONGA

1. Chize Mwene Yesu wafwile ha kulusu.
2. Matukonekena milonga yetu ni shili yetu ola yize yene mutufuliela Mwene Yesu akapwe Chilamwina chetu, mba tunanyingika mutuya mwilu.

Muze atu ewwile longeso lia Mwene Yesu kamunyingikine ngwo, Iye mwe Mwana Zambini. Ambile ngwo, Yoano Chipapachisa hanji Eliya hanji mukwo. Petulu wamutayijile ngwenyi, Yena uli mwe Kristu, mwe Mwana Zambini ya mwono. Majina a Kristu ni Mesaya analumbunuka «Yoze hanamwayisa ni maji». A-Yunda kanatwamingyina Mesaya, Kristu akapwe Mwanangana wo. Kanyingikine ngwo, Mwanangana chamutamba kulianga kwivwa lamba, akamushihe mba akahinduka mukachi ka afu. Chocho akeze nawa akapwe Mwanangana. Azangile kumupwisa Mwanangana haze hene kwatusula kuli A-Roma ni lamba lia hashi. Katayile. Ngwenyi, Ndo mangushiha, ndo munguhinduka mukachi ka afu. Wanangana wami muusoloka mu jila yino ya kufwa ni lamba.

Mwene Yesu yatwala Petulu ni Tiangu ni Yoano ku mulundu mu kulemba. Shimbu machilemba Mwene Yesu walumukine kumeso jo. Ni Eliya ni Mose asolokele nikuhanjika nenvi ha kutwala ku kufwa chenyi. Lk. 9. 31. Petulu yamba ngwenyi, Tutungenu kono yisakila yitatu. Shimbu machinanjika lelwa liaazulaminyine, liji liatuhukilemo ngwo, Yono mwe Mwanami. Muze te liji hiliapatika, tumbaji amwene Mwene Yesu Kristu wika.

Mose ni Eliya atu alemu chikolo alioze kahashile kulamwina akwa hashi. Mwene Yesu wika ha kufwila akwa hashi ha kulusu ni kuhinduka mukachi ka afu mahasa kulamwina akwa hashi. Kashika ola yize yene mufuliela Mwene Yesu Kristu akapwe Chilamwina che, Zambini makukonekena shili ye yeswe, makwaha mwono wa mutolo. Chinambunuka muwiza kutwama nenyi mwilu.

1. Atu eswe anyingikine Mwene Yesu ngwo, Iye mwe Mwana Zambini ni?
2. Yika ambile?
3. Petulu yika akumbulwile?
4. Kulihi Mwene Yesu watwalile tumbaji atatu?
5. E atatu aya?
6. Yika alingileko?
7. Muze Mwene Yesu walumukine kumeso jo Petulu yika ambile?
8. Liji lika liatuhukile mu lelwa?
9. Kuchi te chatamba Mwene Yesu kufwa?

Luka 16. 14-17; 19-31.

Ndongo 18

PICHI NI LAZARU.

CHIHANDA CHA KULILONGESA: Mumu Kristu nawa hanevu lamba kamuwika ha milonga, mukwa ululi hali yihenge, hanga akatunehe kuli Zambini. 1 Petula 3. 18.

YIKUMA YA NDONGO

1. Pichi ni Lazaru shimbu apwile hano hashi.
2. Pichi ni Lazaru kumeso ja Zambini.
3. Kuhanjika cha Apalahama ni pichi.
4. Liji lia Zambini lia kututalikisa mwilu.

MANYONGA

1. Mweswe malituna Mwene mamumbila mu mbongo ya lamba.
2. Mwene Yesu Kristu hanevu lamba ha kulusu kamuwika ha milonga ya akwa hashi.

Tangwa limwe Mwene Yesu Kristu wahanjikile ni tumbaji twenyi ni A-Fwariseu. A-Fwariseu anyongene ngwo, Yetu tuli atu apema. Twakulinga yuma yeswe ni kulita ni shimbi. Kutwapwile ngwe atu akwo, ka. Kashika Mwene Yesu waatelele chishima ngwenyi, Kwapwile umwe pichi. Chize chamuhonene hano hashi chakuhi. Wapwile ni upite, ni chiyulo, ni masepa anji, ni chiseke cha hashi, alioze kanyongene Zambini, hanji alma yenyi, hanji kufwa, hanji miaka ya mutolo, ka. Kwapwile nawa umwe chiswale, Lazaru. Jina lienyi linalumbunuka « Zambini chikwashi chami ». Kanji kanji apombele ni zala kuze kwene ku

chikolo cha pichi. Pichi kamunyongene. Mujimba wenyi wato ni yilonda. Alioze yanyonga Zamb, Yalulika mbunge yenyi ha miaka ya mutolo.

Kufwa kuchishi katonde. Kuchakwiza kuli eswe. Upite weswe wa hashi kuwashile kuchinda kufwa. Lazaru yafwa. Yamusa mu kondo ya Apalahama ku uhwimino. Yeswe yipema, yawaha. Pichi neye yafwa, yamufunda, Mu Heteze—mbongo ya lamba—yahetula meso jenyi, yahanjika ni Apalahama. Apalahama yakumbulula ngwenyi, IWULUKA (chi. 25) Akewuluke yika? Chize alinyongene mwene, yavulama Zamb, ngwe chize kakwashile Lazaru.

Chishima chino chakutulongesa ha miaka ya mutolo.

1. Mihela yiali yiliko. Ku mbongo ya lamba, ni mwilu.
2. Kufwa chakwiza kuli eswe, kuchishi katonde.
3. Waze manyonga Zamb, mafuliela kuli Mwene Yesu Kristu makapwa ni mwono wa mutolo mwilu hamwe ni Zamb. Waze hano hashi keshi kunyonga Zamb, keshi kufuliela kuli Mwanenyi, makapwa ku miaka yeswe mu mbongo ya lamba.

Pichi wambile ngwenyi, Nyi chocho tuma Lazaru kuli ana akwetu atano nguli no, kandeza kuma kuno ku upinjilo. Apalahama ngwenyi, Mikanda ya Mose ni ya Aprofweta kali nayo aevwe. Pichi ngwenyi, Ka, alioze kachi umwe mahinduka mukachi ka afu mafuliela. Nyonga Lazaru mukwo (Yn. 12. 10-11). Yamuhindwisa mukachi ka afu alioze afupile kumushiha kuli asasendote. Mwene Yesu Kristu wahindikile mukachi ka afu hindu atu kafulielele. Ngwo, Tumbaji hamwiya ufuku. Liji lia Zamb tuli nalio. Taliwwe Mwene Yesu Kristu wafwile; wefwile lamba kamuwika kunabu ha milonga ya akwa hashi; wahindikile mukachi ka afu. Mweswe mafuliela mamutwala mwilu kuli Zamb, Hula twanuke kuze maya.

YIHULA

1. Atu angahi aliko ku chishima chino?
1. Lazaru kulibi atwamine matangwa eswe?
3. Pichi wamuhele kulia nyi?
4. Ha kufwa Lazaru kulibi amusele?
5. Ha kufwa pichi kulibi ayile?
6. Kuchi te pichi wayile ku mbongo ya lamba?
7. Mihela yingahi yiliko?
8. Akwa kufuliela muli Mwene Yesu Kristu kulibi maya? Akwo kulibi?

Mat. 8. 1-4; Mar. 1. 40-45; Luk. 5. 12-14; 17. 11-19.

YESU YAWUKA MUKWA MBUMBA

CHIHANDA CHA KULILONGESA :- Ulamwino wakuhi muli mukwo niumwe; mumu chipwe jina lieka liakuhi kushi lia lilo, nilimwe, lize hanalihana hakachi ka atu, chatutamba kulilamwina nalia. Yilinga 4. 12.

YIKUMA YA NDONGO

1. Yoze mapwa ni mbumba chamutamba
 - (a) Kulisolola kuli sasendote.
 - (b) Sasendote machipatula kachi musongo wa mbumba ali nawo nyi ka.
 - (c) Kutwama haze lia chihunda.
2. Mukwa mbumba yafupa Chilamwina.
3. Kristu yamupemesa ku musongo wenyi.

MANYONGA

1. Mbumba chizulie cha shili. Mbumba ha kuputuka, chipeka chikepe—shili chocho yakuputuka nawa.
2. Mbumba yakuhandununa mutu kuli akwo. Chocho shili yakutubandununa kuli Zambi.
3. Kristu wika wahashile kuwuka mukwa mbumba. Chocho Kristu wika mahasa kupemesa hanji kulamwina mukwa shili.

Musongo wa mbumba musongo umwe upi chikolo. Wa kuputuka ngwe chipeka chikepe alioze kulutwe muutanda mujimba weswe. Chikalu kuhinduka ku musongo uze. Ha shakulu muze mbumba yasolokele ku mujimba wa mutu, chamutamba kulisolola kuli sasendote. Sasendote wachipatwile kachi chamwenemwene musongo wa mbumba nyi ka. Kachi musongo wa mbumba mamwamba ngwenyi, Kwapemene hanji wa luchisa. Yoze uli ni mbumba kahashile kutwama mu chihunda nawa. Chamutamba kuhichika zuwo lienvi ni pwo lienvi ni ana jenyi, atwame haze lia chihunda. Chamutamba kufuka muvumbo wenyi wa helu ni kukololoka kuli waze mamukundama ngwenyi, Wa luchisa, wa luchisa. Ulevi 13. 1, 44-46.

Mbumba chizulie cha shili. Akwa hashi eswe kali ni shili mu mbunge jo Kuputuka chapwile kuli mutu umuwika alioze yasambulukila atu eswe. A-Roma 5. 12, 18, 19. Shili vaahandunwine kuli Zambi. Izaya 59. 2 «Alioze utanguko we wakuhandunwine kuli Zambi ni shili ye yasweka meso jenyi kuli yena.»

Mukwa mbumba kahashile kuliwuka mwene. Chizechene ni mukwa shili kahashile kulipemesa mwene. Mukwa mbumba wafupile Mwene Yesu, yamuwana ngwenyi, Mwene, nyi unapale, mubasa kungupemesa. Mwene Yesu wambile ngwenyi, Ngunapale, pwako mupema. Mukwo wakuhi yoze wahashile kumuwuka shina Mwene Yesu Kristu wika. Chizechene ni yetu akwa shili, mukwo wakuhi yoze mahasa kutupemesa ku shili yetu, hanji kutukonekena shili yetu shina Mwene Yesu Kristu wika. Mukwa mbumba wejile kuli Mwene. Yesu, chizechene chatutamba yetu kulinga, kwiza kuli mwe Mwana Zambani mba matupemesa ku milonga yetu yeswe. 1 Petulu 2. 24.

YIHULA

1. Musongo uka lunga wapwile nawo?
2. Kulibi chamutamba kutwama?
3. Wayile ni pwo lienyi ni ana jenyi hamuwika nyi?
4. Iya wayile ku chihunda chenyi?
5. Muze mukwa mbumba wasolokele kuli Mwene Yesu yika ambiie?
6. Mwene Yesu wupalile kumupemesa nyi?
7. Musongo wa mbumba chizulie chaka?
8. Yika yatuhandununa kuli Zambani?
9. Kwali umwe keshi ni shili hanji kavulumwine nyi?
10. Kuchi chatamba kulinga topemene kumeso ja Zambani?

Ndongo 20

Mat. 19. 13-15; 18. 11-14; Mk. 10. 13-16; Lk. 18. 15-17;
Luk. 15. 3-7; Mk. 9. 36-37; Izaya 40.11.

MWENE YESO KRISTU YATAMBIKA ANA EZE KULI IYE

CHIHANDA CHA KULILONGESA: Tayizenu ana akepe eze kuli Yami; kanda nwakanjisa: mumu wanangana wa Zambani wa wano ene. Marku 10. 14.

YIKUMA YA NDONGO

1. Yisemi anehene ana jo kuli Mwene Yesu Kristu.
2. Tumbaji aahumine.
3. Mwene Yesu yakanjisa tumbaji; yatambika ana eze kuli Iye.

MANYONGA

1. Ana mahasa kutoka.
2. Chatamba ana kulilamwina.
3. Mwene Yesu wafwilile ana.
4. Kafunga wafupile mwana-panga yoze watokele.
5. Upale wa Zambani ana eswe alilamwine.

Yisemi anehene ana jo kuli Mwene Yesu hanga aasayike moko jenyi ni kuwahisa e ana. Tumbaji yaakanjisa, yaahuma. Tumbaji anyongene ngwe atu anji matangwa ano ngwo, Mwene Yesu keshi kuzanga ana. O ana wika. Yika maazangila. Mwene Yesu ha kuchivwa wevwile kupiha ngwenyi, Tayizenu ana akepe eze kuli Yami. Marku 10. 14.

Ana mahasa kutoka alioze hi upale wa Zamboni ko ana akepe akatoke. Mt. 18. 14. Mwene Yesu Kristu wafwilile ana akepe. Kanazange eswe eze kuli Iye mba maalamwina. Chikwo nawa kuchatambile kanuke kushimbula ndo mapwa mukulwana kunjila mu wanangana wa malilu, alioze chatamba mukulwana kwalumuka, kulikonyeka akapwe ngwe mwana mba mahasa kunjila. Mt. 18. 3. Mu mukanda wa Izaya 40. 11 tunatange ngwo, «Makunga ana-mapanga mu moko jenyi, maambata mu kondo». Ngwe kafunga mupema wafupile mwana-panga yoze watokele, chizechene Mwene Yesu Kristu wejile mukulamwina yoze watokele. Tunatange ku mukanda wa Izaya 53. 6. «Yetu eswe ngwe mapanga a kupianguka hitunayi mutu ni mutu mu jila yenyi». Hitwapianguka, ni ana akepe ni makulwana. Chatutamba kutá ngwetu, Tuli yivulumunyi chocho mahasa kutulamwina mumu «Yehova wasele hali Iye utanguko wa yetu eswe». Izaya 53. 6, 1 Petulu 2. 24.

YIHULA

1. Aya anehene ana jo kuli Mwene Yesu Kristu aawahise ?
2. Tumbaji yika ambile kuli ayo ?
3. Ha kuchivwa Mwene Yesu Kristu yika ewwile ?
4. Yika ambile kuli tumbaji ?
5. Zamboni kanazange twanuke nyi ka ?
6. Ngwe kuchi unanyingika ?
7. Muze mwana-panga watokele kafunga wamufupile nyi ka ?
8. Kafunga yoze chizulie chaya ?
9. Muze hamuwana yika alingile nenyi ?
10. Iya wambachile milonga yetu mu mujimba wenyi ?

Mt. 19. 16-26; Mk. 10. 17-30; Lk. 18. 18-30.

**PICHI KANDA MUKWA KUYULA YAFUPA
MWENE YESU**

CHIHANDA CHA KULILONGESA; Mumu ku yumbi hananulamwina, ku ufulielo; ni chino hi cha kuli yenwene ko; chawana cha Zamb; hi cha ku yitanga ko, hanga niumwe kechi kalisamba. A-Efwesu 2. 8, 9.

VIKUMA YA NDONGO

1. Pichi kanda mukwa kuyula yatakana ni Mwene Yesu, yamuhula jila ya mwono.
2. Mwene Yesu yamulongesa ngwenyi,
 - (a) Chatamba kungutambula nguli mwe Mwana Zamb.
 - (b) Chatamba kulá ngwe, Nguli chivulumunyi.
3. Mwene Yesu yalongesa tumbaji twenyi ngwenyi, Zamb wika mahasa kulamwina mutu.

MANYONGA

1. Eswe hanavulumuna. Rom. 3. 23.
2. Mwene Yesu wafwite ni kumbata milonga yetu, akatwehe ululi wenyi, 1 Petulu 2. 24.

Pichi kanda mukwa kuyula wejile kuli Mwene Yesu ngwenyi, Longeshi mupema. Mwene Yesu yamukumbulula ngwenyi, Mupema wakuhi niumwe shina umuwika, Iye Zamb. Chinalumbunuka, kanda unguvuluka mupema shina unangufuliela nguli mwe Mwana Zamb. Pichi yamuhula chize chamutamba kulinga akahinge mwono wa mutolo. Mwene Yesu yamutalikisa ku shimbi ngwenyi, Unanyingika maliji a shimbi nyi? Ngwenyi, Shimbi jeswe ngunajifungu chize ku ukweze wami. Shimbi muvhasa kulamwina mutu? Mutu mahasa kufunga shimbi? Ka. Kechi kuhasa alioze Paulu ngwenyi, Chanyingikine shili shina ku Shimbi. Rom. 3. 20; 7. 7. Mwene Yesu wazangile kulongesa yono mukweze akanyingike haze havulumuna. Até ngwenyi, Nguli chivulumunyi. Yoze mukweze watangwile shimbi yimuwika kashika hichapwa ngwe hatangula shimbi jeswe. Tiangu 2. 10. Zamb wambile ngwenyi, Kanda upwa ni mazamb akwo kulutwe liami. Upite wenyi wapwile ngwe zamb kuli iye. Yoze mukweze wasele upite kulutwe mba Zamb kunyima. Upite wenyi wamuhandunwine kuli Zamb. Upite wenyi wamukwikile kutambula mwono wa mutolo. Wombile nyima kuli Mwene Yesu Kristu, wayile kwenyi. Mukwetu, chika chinakukwika kutambula mwono wa mutolo? Hanji hi upite ko alioze hanji chiseke cha hashi, hanji usoko we, hanji ngombo, hanji mazalo hanji kulenga. Ulikehese utambule ululi wa Zamb chawana ha

kufuliela muli Mwene Yesu Kristu. Efwe. 2. 8, 9. Mwono wa mutolo kuchi upwa? Kunyingika mwe Zambani Wamwene-mwene Umuwika ni Yesu Kristu, yoze Zambani wamutumine, Yoano 17. 3.

YIHULA

1. Yoze wejile kuli Mwene Yesu Kristu iya?
2. Yika afupile?
3. Mupema iya?
4. Mukweze yoze wafungile shimbi jeswe nyi?
5. Shimbi yika atangwile?
6. Chika chamukwikile kutambula mwono wa mutolo?
7. Nyi yetu mutuumba nyima kuli Mwene Yesu mutupwa ni mwono nyi?
8. Mwono wa mutolo kuchi upwa?

Luka 19. 1-10.

Ndongo 22

MWENE YESU KRISTU NI ZAKEU

CHIHANDA CHA KULILONGESA :- Kashika kachi umwe mapwa muli Kristu, kachi iye chitanga chaha; yuma yikulu hiyinahu; yuma yeswe yinapu yaha. 2 Kor. 5. 17.

YIKUMA YA NDONGO

1. Mwene Yesu wejile ku Yeriku.
2. Zakeu, mukwa kutwetesa lijimu, wazangile kumona Mwene Yesu.
3. Kahashile mumu te mwihini.
4. Yanyina ku mutondo.
5. Mwene Yesu yamana mushi lia mutondo, yahanjika nenyi.
6. Zakeu yalumuka tangwa lize.

MANYONGA

1. Yeriku vichishingiwa.
2. Mwene Yesu kapalikile nawa ku chihunda chino.
3. Zakeu yalilongesa ngwenyi, Mwene Yesu Kristu wejile mu kufupa ni kulamwina yoze hanatoko.
4. Zakeu yalikehesa. Chenacho chatamba eswe kulinga.

Mwene Yesu wejile ku chihunda cha Yeriku. Yeriku vichishingiwa kuli Zambani muze A-Izalele apupile chihunda. Yoshua 6. 26. Chisuhu chino chasula Mwene Yesu wapalikile ku Yeriku mumu mu jila ali ya kuya ku kulusu. Zakeu yazanga kumona Mwene Yesu. Kahashile mumu ha mbunga ni mumu iye mwihini. Satana kakusa yikwiko vinji mu jila va waze kanazange kumona ni kwiza kuli Mwene Yesu. Kachi Zakeu wambile ngwenyi, Tangwa likwo mungwiza

kumumona, kachi kamwene mwe Chilamwina. Musono lie tangwa lipema. Hep. 3. 7, 8. Zakeu yanyina ku mutondo hanga amone kanawa. Mwene Yesu yakundama ku mutondo, yamana, yamba ngwenyi, Zakeu sunuka mumu musono changuamba kutwama ku zuwo lie. Chenacho chatamba mukwa shili kulinga. Asunuke, alikehese, alilelese, alikonyeke mba Mwene Yesu manjila mu mbunge yenyi.

Mwene Yesu kahulile Zakeu kachi hafunga shimbi. Zakeu wanyingikine kulu ngwenyi, Chafungile shimbi. Mumu kanji kanji wevile mbongo ja akwo. Zakeu wanyingikine ngwenyi, Nguli chivulumunyi. Alioze kanyingikine ngwenyi, Mwene Yesu wejile mu kufupa ni kulamwina yoze hanafoko. Kanyingikine ngwenyi, Mwene Yesu wejile ni kutambika yivulumunyi alikonyeke. Muze mututá ngwetu, Tuli yivulumunyi, mba Mwene Yesu mahasa kutukonekena milonga yetu. Iye wika mahasa kutulamwina.

Zakeu watambwile Mwene Yesu Kristu mu zuwo lienyi. Walumukine tangwa lize. Hatangu iye mwiji alioze ha kufuliela muli Mwene Yesu Kristu tunamono yitanga yaha. Ngwenyi, Mwene, chihanda cha hakachi cha yikumba yami munguhana kuli yiswale; V. 8. Te Zakeu mwe chivulumunyi, malinga chocho? Ka. Alioze haneza kuli Mwene Yesu. Hamutambula mu zuwo lienyi, mwe mu mbunge yenyi. Hanalumuka. Iye chitanga chaha. Weka. Haliapwila mapwa ni manyonga aha ni yitanga yaha, 2 Kor. 5. 17. Kanda tupwa ngwe mukweze pichi ni kulituna chawana cha Zambali alioze tukapwe ngwe Zakeu ni kuzanga kumona Mwene Yesu, ni kutambula chawana cha Zambali, ni kupwa chitanga chaha.

YIHULA

1. Jina lia mukwa kufwetesa lijimu iya?
2. Kuchi te wapwile pichi?
3. Zakeu wazangile kumona iya?
4. Ngwe kuchi wamumwene kanawa, chikwiko chakuhi?
5. Muze Mwene Yesu wahetele ku mutondo yika ambile kuli Zakeu?
6. Watambwile Mwene Yesu mu zuwo lienyi nyi ka?
7. Apwile kuchi muli Kristu?
8. Nyi yetu mutufuliela Mwene Yesu Kristu mutupwa kuchi?

Mt. 21. 1-22; Mk. 11. 1-11; Lk. 19, 29-40. Ndongo 23
**MWENE YESU YANJILA MU YERUSALEME IYE
MWANANGANA**

CHIHANDA CHA KULILONGESA :- Wejile ku yuma yenyi mwene, ni
atu jenyi mwene kaMutambwileko; alioze kuli waze eswe
amutambwile wahanyine chiyulo cha kupwa ana a Zamb, i
te kuli waze akufuliela ku jiba lienyi. Yoano 1. 11, 12.

YIKUMA YA NDONGO

1. Aprofweta yasoneka ha kutwala kuli Mwanangana yoze
malamwina.
2. Tumbaji yanaha chimbulu kuli Mwene Yesu Kristu.
3. Mbunga yamusambilila ha kunjila mu Yerusaleme.
4. Mwene Yesu yalilila Yerusaleme.
5. Ana yamuhalisa mu tembele; asasendote yamuvwila
kole.

MANYONGA

1. Chimbulu wa kukasa ku makano—Mukwa shili wa
kukasa ni malenge a shili; neye yapwa ku makano a
matapalo.
2. Tumbaji yamujitula. Akwa kwambujola kapwa akwa
kujitula mukwa shili.
3. Mazalo—Cheswacho 'chili ku moko jetu tuchikunjike
kuli Mwene.

Profweta Zakaria wasonekene ngwenyi, Talenu
Mwanangana wenu kaneza kuli yenu: Iye mukwa ululi
kanda mukwa kulamwina. Iye mukwa kulilelesa, kaneza
nikutwama hali chimbulu ni hali mwana chimbulu. Zk. 9. 9.
Mianangana ayulile A-Izalele miaka yinji alioze mumu ha
ungulungulu wo mianangana a mavungu apupile chifuchi
cho, aatwalile tupinji ku chifuchi cheka. Alioze Zamb, i kuli
Zakaria kanalweze A-Izalele ngwenyi, Munukapwa ni
mwanangana mukwo. Iye mapwa chihomboloji, malilelesa,
manaha ulamwino. A-Yunda ataliletalile tangwa lize ngwo,
Tangwa lika meza? Mutumunyingika nyi?

Mwanangana wo veza, yasemuka chiswale, kamunyingi-
kine. Yalinga yikomokeso kumeso jo hindu kamutambwile;
yafupa ngwe chize mahasa kumushiha. Tangwa lia kufwa
chenyi yilikundama. Mwene yatuma tumbaji kusaka
chimbulu ku makano a matapalo. Amuneheneve mumu
mwene wenyi hatá. Alileho mazalo jo... Chocho asambi-
lilile mwanangana wo. Mt. 21. 9.

Nvonga yoze chimbulu wa kukasa ku makano. Nikulita
ni shimbi chatamba kukula chimbulu nyi ka, amakune kota

yenyi. Yono wa kukasa chizulie cha mukwa shili wa kukasa ni malenge a shili. Kulihi ali? Ku makano. Mukwa shili neye ku makano ali—jila yimwe ya kuya mwilu; jila yikwo ku mbongo ya lamba. Kahashile kulikasulula, ndo mukwo. Tumbaji—e akwa kwambujola. Yamukasulula akalingile Mwene Yesu Kristu. Chizechene ni mukwa shili—mamukasulula akalingile Mwene Yesu Kristu. Kahashile kumukasulula ndo mwene wenyi hatá, Chizechene mukwa kwambujola kahashile kukasulula ku malenge a shili ndo mukwa shili matá mu mbunge yenyi, chocho mahasa. Wa kukasa kahashile kulingila Zambí alioze kakumukasulula hanga amulingile. Alileho mazalo. Yeswayo yili mu moko jetu tuyikunjike kuli Iye.

Anji amusambilile ni makanwa jo ngwo, Iye Mwana-ngana wetu alioze mu mbunge kamutambwile alioze kuli waze eswe amutambwile waahela chiyulo cha kupwa ana a Zambí, te kuli waze akufuliela ku jina lienyi.

YIHULA

1. Aya ayile ni kusaka chimbulu?
2. Muze mwenya chimbulu wamwene tumbaji nikujitula chimbulu kuchi ambile?
3. Muze anchene chimbulu kuli Mwene Yesu Kristu yika asele hali iye?
4. Iya watwamineho?
5. Atu yika akotolokele?
6. Mu zuwo lika anjilile mu Yerusaleme?
7. Asasendote ewwile kuwaha nyi?
8. Iya kali ni uhaliso ungunu?

Ndongo 24

Mateu 26. 14-16 ; 20-30 ; Marku 14. 10, 11, 17-26 ;
Luka 22. 3-6 ; 14-20 ; Yoano 13. 21-30.

CHIZOMBOKA CHA KUSULA—SEYA YA MWENE

CHIHANDA CHA KULILONGESA ; Mumu musenge uno manyinga jami a usendo waha waze anamwangana hali anji ha ukonekeno wa milonga. Mateu 26. 28.

YIKUMA YA NDONGO

1. Yundase Ka-Kerote yalanjisa Mwene.
2. Mu chipatulo cha kwilu Mwene Yesu yasolola Yundase, mwe mukwa kumhandukulula.
3. Chizomboka cha kusula—Seya ya Mwene yitangu.

MANYONGA

1. Yundase. Milima.
2. Ulumbunwiso wa Seya ya Mwene.
3. Mbolo ni vinyu—Yilayi ya mujimba ni manyinga a Kristu.

Yundase Ka-Kerote wapwile kambaji ka Mwene Yesu Kristu. Yaliendela nenyi tangwa ni tangwa. Yevwa longeso lienyi alioze kamutambwile ngwenyi, Iye Kristu, mwe Mesaya. Tumbaji akwo yamfuliela, Yundase ka. Kwenda ni akwa Kristu kuchapwishile mutu mukwa kufuliela. Chatamba kwalumuka mu mbunge. Yundase kalumukine. Kutunga ku Missão kuchapwishile mutu mukwa kufuliela. Mwene Yesu yanyingika Yundase kwe ku uputukilo, kala-jalile. Yundase yalifesa ni asasendote kukunjika Mwene Yesu Kristu ha makumi atatu a mbongo, ndando ya kap nji. Kristu lie Pangu Jia hashi—Yundase yatuhuka, hapwile ufuku—milima pwi. Yoano 13. 30.

Chizomboka cha kusula—Mt. 26. 17-25. Chizomboka, chiwanyino A-Yunda alingile mwaka ha mwaka chapwa chiwulwiso cha ufuku uze muze Zambi akatwishile atu jenyi ku chifuchi cha Engitu ni kwoko lia tachi. Mu mazuwo ja A-lzalele yoze wafwile, mwana-panga. Kutu, 12. 3-13. Kuli akwa shile yoze mapwa mwana-panga Mu kwafwila, mwe Mwene Yesu Kristu. Mweswawo meza kuli Iye mapwa ni mwono.

Akwa hashi mavulie akwete kashika Mwene Yesu yasela vilayi yino ya mbolo ni vinyu yipwe chiwulwiso cha kufwa chenyi. Mt. 26. 26-28.

- Mbolo**-1. Kutunyongesa. lamba ewwile Mwene Yesu, lia shikote ni mbambo.
2. Kutunyongesa kufwa chenyi. Tala Yn. 12. 24.—Lunona wa filiku.
 3. Mbolo ya yocha mu forno. Utenu wa Zambi wapwile hali Mwanenyi mu milima. Sam. 88. 7.
 4. Mbolo ya muwundu—cha kutunyongesa kulinunga kuchili ni Mwene Yesu ni akwa kufuliela. Yoano 17. 21, 24; Hep. 2. 11.

- Musenge** 1. Kutunyongesa mwono wenyi autumbikile. Yoano 10. 18; Izaya 53. 12.
2. Manyinga amwangine Hep. 9. 22.
 3. Kunwa twachitambula. Yoano 6. 55.
 4. Uwahililo wenyi ni wa yetu nawa. Yn. 15. 11;

YIHULA

1. Iya walanjishile Mwene Ycsu Kristu?
2. Kwenda ni akwa Kristu hanji kutwama ku missãu cha kutupwisa mutu mukwa Kristu nyi?
3. Hali iya Mwene Yesu watachilile lupapa ni kumwähaye?
4. Mbolo chizulie chaka?
5. Vinyu chizulie chaka?
6. Kulia mbolo ni kunwa vinyu cha kupwisa mutu mukwa Kristu nyi?
7. Kuchi cha kupwisa mutu mukwa Kristu?

Ndongo 25

Lk. 22. 39-53; Mt. 26. 36-56; Mar. 14. 32-53; Yn. 18. 1-14.

MWENE YESU MU NGETESEMANE

CHIHANDA CHA KULILONGESA: Yetu eswe ngwe mapanga hitunapianguka; hitunahambuluka mutu mweswe ni jila yenyi mwene; ni Yehova hanatwika hali Iye uhenge wa yetu eswe. Izaya 53. 6.

VIKUMA YA NDONGO

1. Mwene Yesu yalemba mu Ngetesemane.
2. Tumbaji mu tulo.
3. Yundase.

MANYONGA

1. Mwene Yesu yatambula milonga ya akwa hashi eswe.
2. Akwa hashi anji mu tulo ali.
3. Anji hanapu akwa kwonga.

Mwene Yesu vatuhuka hamwe ni tumbaji twenyi hiku ya ku Ngetesemane. Mwene Yesu Kristu yalemba ukawenyi; yafulamana hashi nikulemba kuli Tato — Iye ni Tato umuwika; yapinda nikulemba ndo matukuta yapwa ngwe masoto a manyinga; yalemba yisoho yitatu. Kristu mwe mutu yalemba ngwenyi, Tata kachi unapale chiza musenge uno kuli yami. Kristu mwe Chitakanyishi yalemba ngwenyi, Hindu hi upale wami ko alioze niwe ukalingiwe. Chocho mungelo yasoloka nikumutakamisa. Chamulamba kunwa musenge uze wa kufwa ha kulusu hanga ulamwino ukapwe niwetu, 1 Kor. 10. 16. Mwene Yesu yanyingika lamba lize mamona ha kulusu shimbu kanda aheta, alioze lamba liabiana mulipwa ha ola yize Zambzi Tato mamwehuka, muze utenu wenyi weswe muupukuka hali Iye mumu ha shili ni milonga ya akwa hashi. 1 Petulu 3. 18.

Mwene Yesu yawana tumbaji mu tulo. Chikalu hali ayo kunyingika yuma yize muyipwa. Anji chocho apwa musono mu tulo mumu kanyingikine lamba lize muliza kuli waze kanyingikine Kristu. Ha ola ya kulemba kalembele kashika muze cheseko hicheza yevwa woma, yachina. Kanji kanji akwa Kristu kanakokoloka, kalayile, kalembele. Kashika muze cheseko muchiza kajikijile, malimbuka, mahambuluka mu jila, machina, malikala Mwene wo.

Yundase yeza ku Ngetesemane ni mbunga ni tutana ni mbwechi. Yahandukulula Mwene Yesu ni mbeju. Yundase yasoloka kuli Mwene Yesu Kristu ngwe kambaji kenyi kanda mukwa kumufuliela kanda mukwa kumuzanga, alioze ma mbunge yenyi mwapwile chipululu cha mbongo, yapwa kusuku ni Zambi. Yapwa mukwa kulingila Satana. Kwali waze kakusoloka ngwe akwa kufuliela muli Mwene Yesu Kristu alioze mu mbunge jo kamufulielele. Hapwa kusuku ni Zambi, ni hapwa akwa kukaula yuma ya luchisa. Shinjika twanuke kupatula pundu mu mbunge jo akaule Mwene Yesu Kristu.

YIHULA

1. Yika alingile Mwene Yesu Kristu mu Ngetesemane ?
2. Yika alembele ?
3. Musenge uze kuchi upwa ?
4. Kuchi te chamutamba kunwa musenge uze ?
5. Iya wasongwelele akwa tutana ?
6. Neka amuhandukulwile ?

Ndongo 26

Lk. 23. 1-5, 13-26; Mt. 27. 1-26; Mk. 15. 1-15;
Yn. 18. 28-40.

MWENE YESU KUMESO JA PILATU

CHIHANDA CHA KULILONGESA:- Talenu mwe Mwana-panga wa Zambi, Yoze machiza shili ya akwa hashi. Yoano 1. 29.

YIKUMA YA NDONGO

1. Yakwata Mwene Yesu.
2. Mwene Yesu kumeso ja Pilatu.
3. Pilatu yakunjika Mwene Yesu akamuhachile ha kulusu.

MANYONGA

1. Upatwilo kulutwe
 - a. Waze kafulielele muli Mwene Yesu Kristu chaatamba kusoloka ku ngunja yitoma yinene.
 - b. Waze hanafuliela kulu kechi kusoloka ku ngunja vitoma yinene mumu hanapatwila kulu milonga yo muli Mwene Yesu Kristu ku Kawwale.

Yakwata Mwene Yesu, yamutwala kuli asasendote ni makulwana. Yamuhisa ngwo, Walipwisa Mwana Zambikanda Mwanangana. Kulutwe yamutuma kuli Pilatu ni kumuhisa ni maliji wa ene ngwo, Walipwisa Mwana Zambialioze kawanyine muli Iye chitela nichimwe cha kutelakufwa. Yamutuma kuli Heronde. Neye kawanyine chitela cha kufwa muli Iye. Heronde yazanga kumona Mwene Yesu alinge chilayi kumeso jenyi alioze Mwene Yesu kapwile ni Iji kuli Iye. Kakumbulwile nichimwe. Muze Heronde yamona yilayi ni yikomokeso yize alingile Kristu kayi angile. Haliapwila yazanga kumona, Mwene Yesu kalingile. Tangwa lia vumbi MUSONO. Musono we mwaka upema... tangwa lia ulamwino.

2 Kor. 6. 2; Hep. 3. 7, 8, 15; 4. 7.

Yamuhilwisa kuli Pilatu. Pilatu yazanga kumutusula, kashika yavuluka ndako yenyi kutusula yoze atu matongola. Ngwenyi, Ngutusule Mwanangana wenu nyi? Akololokele ngwo. Tutuswilenu Mbarapa. Mbarapa iya? Chingalwe. Chizulie cha swana ya hashi ni milima ni yize yeswe ya luchisa, hindu A-Yunda yamutoangola Chizechene ni musoao anji kakutongola chiseke cha hashi ni swana ya hashi akaayule ni kulituna mwe Mwana Zambini we mwono. Chatamba mweswe atongole yoze mamuyula shina Satana nyi, shina Mwene Yesu Kristu.

Pilatu yahasa kutusula Mwene Yesu alioze kapatwile ni ululi. Kamutuswile. Mwene Yesu Kristu kumeso ja Pilatu chizulie cha upatwilo uze muwiza kulutwe. Mwene Yesu yamona la upatwilo hali akwa hashi hanga eswe atusuke mu malenge a shili akapwe ni mwono. Waze eswe kasolo kufuliela muli Mwene Yesu Kristu kulutwe kumakamana ku ngunja yinene yitoma ni Zambimeza kwapatwila ni kwahisa mumu kafulielele mwe Chilamwina cha hashi. Usol. 20. 11-15. Waze hanafuliela kechi kusolokako se hanapatwila ku jina lia Mwene Yesu Kristu. Yoano 3. 17, 18. Shinjika ana kutala kuli Mwene Yesu Kristu mwe Mwanapanga wa Zambiyozemachiza shili yo yeswe.

YIHULA

1. Kuli aya aliangile kutwala Mwene Yesu Kristu?
2. Iya wazangile kumutusula?
3. Kuchi te kamutuswile?
4. A-Yunda yika akololokele?
5. Atongwele iya? Chizulie chaya?
6. Atongwele kanawa nyi?
7. Atu eswe musono kakutongola kanawa?
8. Waze kafulielele kulihichaatamba kumana kulutwe?
9. Kuchi te waze hanafuliela kechi kamanako?

Mt. 27. 27-50; Mk. 15. 16-47; Lk. 23. 26-56. Yn. 19. 16-42.

AHACHILILE MWENE YESU HA KULUSU

CHIHANDA CHA KULILONGESA :- Yoze kanyingikineko shili, amupwishi shile shili mumu hali yetu; banga tukapwe ululi wa Zambini muli Iye. 2 Kor. 5. 21.

YIKUMA YA NDONGO

1. Mu jila ya kuya ku Kavwale.
2. Ha kulusu.
3. Kufwa ni kufunda cha Kristu.

MANYONGA

1. Mwene Yesu ha kulusu.
2. Milimo ya ku kulusu.
3. Mubuza.

Lumbununa kuli twanuke vize yapwile muze Pilatu yamukunjika ndo yamuhachila ha kulusu. Mt. 27. 27-44. Mutu yoze ha kulusu:

1. **Iye Mwene, Iye Zambini**—Hep. 1. 1-3 ni Yn. 1. 14. Yalipwisa musunya akachize shili ya akwa hashi ha kulibana chitapo Iye Mwene. Hep. 9. 26.
2. **Yesu**—Mwe Chilamwina. Mt. 1. 21. Yasemuka hano akahane mwono wenyi ndando ya ukule hali anji. Mk. 10. 45.
3. **Kristu**—Yoze hanamuwayisa ni maji—mwe Mesaya. Mt. 26. 63, 64.

MILIMO vize ya ku kulusu yapwa:

1. Chuma cha pundu. Kristu wafwile—Roma 8. 34.
2. Kristu Iye Chisalakanyi cha yitanganyanyi ni yihenge. Roma 5. 6-8; 1 Pet. 3. 18.
3. Yafwa kamuwika kunahu. Rom. 6. 9-10; Hep. 9. 12, 28. Ku Shimbi ha shakulu. A-Izalele yanaha panga, hanji ngombe, hanji pembe yisuhu yeswe mavulumuna alioze Mwene Yesu Kristu yatumbika mwono wenyi kamuwika kunahu.
4. Ku kufwa chenvi hatusula akwa shili ku malenge a shili ni ku tachi ja Satana. 2 Kor. 5. 17; Rom. 5. 17.
5. Yakutusula mukwa kufuliela ku:
 - a. Lamba lia shili yenyi. 1 Kor. 15. 2-4; [Gal. 1. 1. 4.
 - b. Ku tachi ja shili ha mwakono. Rom. 6. 10, 11, 14.

Mubuza ha kulusu: Iye chivulumunyi munene, kanamono lamba lia shili yenyi. Shili yakuneha lamba. Gal. 6. 7. Kanatela kufwa chize cha kulusu. Rom. 8. 5-8. Katelele keke. Efwe. 2. 1-3, 12, 13. Kahashile kulikwasa hanji kulilamwina.

1. Kabashile kulinga milimo akalilamwine mumu moko jenvi akuhata ku kulusu. Efwe. 2. 9; Roma 4. 5.
2. Kabashile kuzondama ha makungunwa alemle.
3. Kapwile ni mbongo akafwete ulamwino. Usol. 22. 17.
4. Kabashile kutambula upapachiso, hanji kutambula mbolo ni vinyu mu kwiwuluka Mwene Nyi mamulamwina ndo ni vumbi lia Mwene chawana.

Yono muhuza chizulie cha akwa hashi eswe kumeso ja Zambi. Roma 3. 23. Katele'e keke; kulinga milimo kulilamwina chamokomoko; kuhana mbongo nechochamokomoko; kanatoko, yeswe yapwa milima pwi; kutalatala chakubi ndo kuhetula meso ni kumona Mwene Yesu Kristu ha kulusu—Iye Chisalakanvi cho, kanda Chilamwina cho, kanda Mwene wo kutwila milonga yo. Chikwo kufuliela Mwene Yesu Kristu yahinduka mukachi ka afu ni ku uhindikilo wenyi yakumba kufwa ni Satana. Mwene Yesu yamba kuli muhuza ngwenyi, Musono mukapwa hamwe ni Yami . . . akwa hashi kali ni Liji lia Zambi ngwenyi, Mweswawo . . . Yn. 3. 16. Yoze mevwa . . . Yn. 5. 24.

YIHULA

1. Atu angahi aahachilile ha kulusu?
2. Eswe atelele kufwa chize nyi?
3. Mihuza angahi alikonyekene?
4. Mwene Yesu walitunyine muhuza mumu te himafuliela ola ya kusula nyi?
5. Kuchi te Mwene Yesu Kristu wafwile?
6. Chisonoko chika asele helu lia mutwe wenyi?
7. Chika chapwile hashi heswe shimbu utenu wa Zambi wapukukilile hali Iye?
8. Ha kukunjika Spiritu yenyi chika chapwile mu tembele?
9. Iya wechile mujimba wenyi aufunde? Kulihi amufunjile?

Ndongo 28

Mt. 28. 1-15; Mk. 16. 1-14; Lk. 24. 1-12. Yn. 20. 1-18.

UHINDUKILO WENYI

CHIHANDA CHA KULILONGESA:—Yami nguli we uhindikilo ni we mwono: yoze mafuliela kuli Yami, chipwe mafwa, hindu kumakapwa ni mwono. Yoano 11. 25.

YIKUMA YA NDONGO

1. Akwa kukaula Mwene Yesu Kristu yevwa chinyengo chinji ha kufwa chenyi.
2. Ha tangwa litangu mapwo yaya ku fuka.
 - a. Yalangumwina liwe kuli mungelo.

- b. Maria Ka-Mandala yaya ni kwambulwila tumbaji.
 - c. Mapwo akwo yeza, yevwa sango lia mungelo.
3. Maswalale yashindakenya ngwo, Kristu habinduka mukachi ka afu.
 4. Petulu ni Yoano yaya ku fuka.
 5. Mwene Yesu yasoloka :
 - a. Kuli Maria Ka-Mandala.
 - b. Kuli e kumi ni umuwika.
 - c. Kuli aali mu jila ya ku ya ku Emeu

MANYONGA

1. Se Mwene Yesu yahinduka tunanyingika kufwa chenyi hali yetu chawahila Zambizi Tatu.
2. Se Mwene Yesu yahinduka tunanyingika yetu nawa mutuhinduka.
3. Uhindikilo wa Kristu wakutwaha chiyulo cha kwenda mu mwono waha.

Lumbununa kuli twanuke yuma yize yapwile tangwa litangu lia semana ni ku fuka ni ku zuwo.

Asasendote ewulukile liji lia Mwene Yesu Kristu. Yaya kuli Pilatu ngwo, Yono mukwa kwonga wambile ngwenyi, Munguhinduka. Ambenu kashika akoleke fuka. Nikukoleka fuka yanyonga ngwo, Mutumukwika kuhinduka. Kabashile. Yil. 2. 24; Mt. 28. 2-4. Kabashile kufunga mwe Mwana Zambizi mu fuka. Kwapwile minviko; mungelo yahulumuka mwilu, yalangumuna liwe ku chikolo. Mwene Yesu Kristu yakumba kufwa ni Satana.

Tunanyingika Mwene Yesu Kristu yahinduka pundu mumu yasoloka kuli Maria ku fuka, Yn. 29. 13-18; kuli Petulu, Lk. 24. 34; kuli aali mu jila ya kuya ku Emeu, Lk. 24. 13-31; kuli tumbaji, Lk. 24. 36-43; Yn. 20. 24-29; Yn. 21. Ku uhindikilo wa Kristu tunanyingika kufwa chenyi hali yetu chawahila Zambizi Tatu, kuchatulambite kufwa ha shili yetu. 1 Kor. 15. 17. Chikwo nawa tunanyingika pundu se Mwene Yesu Kristu yahinduka mukachi ka afu ni yetu nawa mutuhinduka—Mwene Yesu Kristu yahinduka ni mujimba weka, Fwilibu 3. 21, ni mujimba wa uhenya. 1 Kor. 15. 42-44, 49. Haliapwila tuli ni mujimba wa kupola alioze tangwa lize mutupwa ni mujimba wa uhenya, uze walifwa ni mujimba wa Mwene Yesu Kristu. Nyonga chikoliongo. Kashitu yoze manjila weka, voze matubuka weka. Mujimba waha, wa uhenya. 1 Kor. 15. 19-22. Rom. 6. 4. —Tunanyingika pundu ha kufuliela muli Mwene Yesu Kristu mutufwa ku shili, mutwalumuka, mutupwa ni manyonga aha ni yitanga yaha, ni tachi jaha mujilinga ni chiyulo chaha mu mbunge jetu, hi cha Satana ko, mwe

mupi alioze cha Mwene Yesu Kristu. Nyonga lunona wa trigu hanji wa chivwale, matwama ukawenyi ndo mamutumba hashi akafwe mba masloka ni mwono waha ni mujimba weka.

YIHULA

1. Waze ayile ku fuka tangwa litangu aya?
2. Iya walangumwine liwe?
3. Muze maswalale aze afungile fuka aghimwene yika alingile?
4. Kuli iya Mwene Yesu wasolokele hatangu?
5. Uhindikilo wa Mwene Yesu kuchi unatulongesa?
6. Chatamba kufwa mba tupwe ni mwono waha, nyi mutuhasa kupwa nawo haliapwita?

Ndongo 29

Mt. 28. 16-20; Lk. 24. 49-53; Yn. 20. 24-29; Yjl. I. 8-11;
I Tes. 4. 16-18.

MWENE YESU YAZEZUKA MWILU—KUMEZA NAWA CHIHANDA CHA KULILONGESA :- Malunga A-Ngalileya, kuchi te nunamana nikutala mwilu? Yono Yesu, hamuchiza kuli yenu amutambwile mwilu, chocho kumakeza chizechene ngwe hinwamumona nikuya mwilu. Yil. 1. 11,

YIKUMA YA NDONGO

1. Mwene yasoloka kuli tumbaji ni Tomase.
2. Ha mulundu wa Olevwe
 - a. Mwene Yesu yatuma tumbaji twenyi akambujole.
 - b. Amupindumwine kwilu.
 - c. Sango lia angelo ha kwiza chenyi nawa.

MANYONGA

1. Shindakenyo ya Tomase ha kumona Mwene Yesu.
2. Kawaha waze kamumwene hindu hanafuliela.
3. Akwa Kristu akapwe nikutalatala kwiza chenyi.
4. Mwene Yesu Kristu kumeza nawa.
 - a. Chatutamba kwononoka ku liji lienyi lia kusula ngwenyi, Yénu nukambujole.
 - b. Kwononoka muchineha uwahililo ha kwiza chenyi.
Muze Mwene Yesu Kristu yasoloka kuli tumbaji akwo Tomase te keshiko. Ha kwivwa shindakenyo ya akwo kafulielele. Ngwenyi, Ndo mungumona... mba mungufuliela ngwami, Hahinduka. Ha kumona Mwene Yesu Kristu Tomase yamba ngwenyi, Mwene wami kanda Zambiyami. Ha kumumona mba yafuliela. Mwene Yesu yamba ngwenyi,

Kawaha waze kamweneko hindu anafuliela. Akwa hashi kanevu Sango Lipema ngwo, Mwene Yesu yafwila milonga yo, yamufunda, alioze tangwa liamuchitatu yamuhindwisa mukachi ka afu. Kanafuliela chipwe kamwenē nyi? Kutuchi kumumona meso ni meso hano hindu chatamba kufuliela chize liji linambe hali Iye. Hep. 11. 1-6.

Tangwa lize Mwene Yesu Kristu makatuka kuli tumbaji yaashika ngwenyi, Yenu. Kulibi? Hashi heswe. Nikulinga vika? Nukambujole. Yika mambujola? Sango Lipema. Kuli aya? Atu eswe. Chatamba kuhichika mazuwo jo, ni masepa jo ni yuma yeswe alioze wambile ngwenyi, Mungukapwa hamwe ni yenu. Mwene Yesu watongwele tumbaji, yaalamwina, yaalongesa, yaatuma, akapwē tunganda twenyi, kanda akwa kumulingila, kaada yela. Chizechene Mwene Yesu musono kanatongola akwa kumulingila.

Shimbu machihanjika no, yazezuka mwilu—milimo yenyi hano hiyahwa. Hafweta ndando ya shili, haliapwila machihakwila akwa hashi. Roma 8. 34; Hep. 7. 25.

Chocho kumakeza. Yil. 1. 11. Iya meza? Mwene Yesu Kristu kumakahulumuka mwilu. 1 Tes. 4. 16. Mejila aya? Akwa Kristu. Ya. 14. 1-3. Tangwa lika? Kutwanyingikine. Yika chatutamba kulinga hanga muze meza tuye nenyi? Chatutamba kufuliela chize Mwene Yesu alingile ha kulusu ni ku uhindikilo wenyi. Kwiza chenyi chapwa chuma cha uwahililo kuli waze kanamufuliela. 1 Kor. 15. 55-57. Alioze kuli waze kamufulielele chinyengo ni mwongo. 2 Tes. 1. 7-10; Lk. 13. 25-28.

YIHULA

1. Iya kapwileko hamwe ni tumbaji muze Mwene Yesu asolokele kulutwe lia kuhinduka chenyi?
2. Ha kwivwa shindakenyo ya akwo wafulielele nyi?
3. Kuchi ambile?
4. Chatamba kumona Mwene Yesu Kristu mba tumufulielele nyi?
5. Shimbu Mwene Yesu kanda azezuka mwilu shiko lienyi lika?
6. Aya asolokele kuli tumbaji shimbu machiya mwilu?
7. Tangwa lika Mwene Yesu Kristu meza?
8. Yika mutwivwa tangwa lize?
9. Kulihi mututakana nenyi?
10. Waze matakana nenyi aya?
11. Yika analingi mwilu haliapwila?

ARQUIVO LARA

Visado Pela Censura
do Huambo

Imprensa Evangélica Boma, Luso, Angola.

ARQUIVO L. LARA

D/399
7805